



BOSNA I HERCEGOVINA
Ministarstvo odbrane-obrane



БОСНА И ХЕРЦЕГОВИНА
Министарство одбране-обране



БИЛТЕН BILTEN

Ministarstva odbrane - obrane i Oružanih snaga Bosne i Hercegovine
Министарства одбране и Оружаних снага Босне и Херцеговине


novembar/studeni 2010. broj 5

носембар 2010. број 5



1. decembar -

Dan Oružanih snaga BiH.....	2
Misija ISAF u Afganistanu	4
Intervju: komandant NATO Štaba u Sarajevu brigadni general David Enyeart.....	8
Iskustva pripadnika Oružanih snaga BiH iz misija.....	10
Tranzicija vojnog personala.....	15
Aktivnosti - od maja do novembra 2010. godine.....	16
Iz jedinica Oružanih snaga BiH.....	20



Bilten Ministarstva odbrane BiH i Oružanih snaga BiH

broj: 5
novembar 2010. godine

izdavač: Ured za odnose s javnošću
Ministarstva odbrane BiH
urednik: Uma Sinanović
sarađuju: Amela Mostarlić, Ahmed
Čuprija, Antonija Perak
lektor: Miodrag Filimonović

Tehničku pripremu i štampanje finansirao NATO štab u Sarajevu

Ured za odnose s javnošću
Ministarstva odbrane BiH

adresa: Hamdije Kreševljakovića 98 –
71000 Sarajevo
e-mail: info@mod.gov.ba
kontakt: telefon 033/286-680,
fax 033/286-685
web: www.mod.gov.ba



Godina 2010. je za OS BiH godina racionalizacije i smanjenja brojnog stanja OS BiH, ali to nije umanjilo spremnost i sposobnost OS BiH da izvršavaju svoje zadatke shodno zakonskim rješenjima. U odnosu na prethodni period priprema, organizacija i realizacija postavljenih zadataka je mnogo složenija po svom obimu i zahtjevima te angažovanju ljudskih i materijalnih resursa, ali iste OS BiH izvršavaju sa visokim stepenom uspjeha.

Ovakav uspjeh OS BiH značajno pripisuju obuci koja je fundamentalna za izvršavanje zadataka. Značajno je istaći primjenu Programa koncepta operativnih sposobnosti koji je alat NATO i kojem su OS BiH službeno pristupile deklarisanjem jedinica u „Pool of Forces“ čime se žele unaprijediti kapaciteti i dostići zadovoljavajući nivo interoperabilnosti što jedinicama OS BiH omogućava veće učestvovanje u NATO vođenim operacijama. Izvođenje velikog broja vježbi različitog karaktera i nivoa za komande i jedinice OS BiH te njihovo sprovođenje sa drugim institucijama i agencijama samo upotpunjava sliku da su OS BiH dostigle zadovoljavajući nivo obučenosti.

Menadžment ljudskih resursa značajno je uložio napore da svi segmenti ovako značajnog polja za OS BiH budu zastupljeni. U toku 2010.godine na 425 aktivnosti iz oblasti edukacije u BiH i van nje je bilo 2747 lica. Shodno potrebi znavljanja kadra profesionalna vojna služba prestala je za 1322 vojnika

starija od 35 godina starosti. U cilju održavanja operativnih sposobnosti komandi i jedinica konkursom će u ovoj godini biti primljeni kandidati na 600 upražnjenih vojničkih formacijskih mjesta.

U toku je proces prijema kandidata, a u nastavku procesa, poslije završenih pregleda, biće nastavljeno njihovo obučavanje. Prekategorizacija te školovanja pripadnika OS BiH na vojnim akademijama, komandno-štabnom i generalštabnom usavršavanju značajniji su aspekti za budućnost kadrovanja u OS BiH.

Međunarodna saradnja implementirana je kroz veliki broj programa na različitim poljima. Reprezentativno je, ipak, učešće Pješadijske jedinice OS BiH u misiju ISAF pod vođstvom NATO koja je upućena u sastav danskog kontingenta sa zadacima obezbjeđenja lokacija. Osim ove jedinice u Afganistanu se nalazi još deset oficira u sastavu njemačkog i danskog kontingenta. Pet mirovnih posmatrača se nalazi u misiji UN u Kongu.



Dan Oružanih snaga BiH

Na strateškom nivou, održavanje konferencije Američko-jadranske povelje u BiH u organizaciji OS BiH jasno ukazuje koliko iste imaju povjerenja kod partnera. Prisustvo najviših zvaničnika NATO samo potvrđuje činjenicu koliko je cijenjeno partnerstvo saveznika naročito na polju regionalne bezbjednosne saradnje.

U BiH OS BiH su pružale pomoć civilnim strukturama na više različitih polja. Značajno je istaći pomoć pri reagovanju na prirodne i druge nesreće (opštine Bileća, Derventa i Čelinać, Bičeljina, Livno i Tomislavgrad) te medicinske evakuacije u BiH i inostranstvu.



Kako bi građani BiH bili bezbjedni, shodno razmještanju komandi i jedinica OS BiH, ulažu se naponi da se neperspektivno naoružanje i municija kao i postojeći viškovi unište. Uništenje 8.137 tona municije i minsko-eksplozivnih sredstava te 30.081 komada pušaka distinktivno određuje koliko su OS BiH posvećene izvršenju ovog zadatka.

organizacijom takmičenja unutar BiH tako i na međunarodnom planu. S obzirom da su OS BiH članica CISM-a broj aktivnosti na ovom polju se značajno povećao što smatramo kao još jedan značajan korak u međunarodnoj saradnji.

U narednom periodu OS BiH će imati izazove koji se mogu determinisati u:

- organizaciji upućivanja pripadnika OS BiH u misije u inostranstvu i povedanju učešća u misijama podrške miru;
- obuci imenovanih jedinica za Koncept operativne sposobnosti;
- ispunjavanju preuzetih obaveza po pitanju implementacije partnerskih ciljeva;
- intenziviranju obuke i povećanju ukupne spremnosti za pružanje pomoći civilnim strukturama u umanjuju posljedica prirodnih drugih katastrofa
- pripremi, organizaciji i realizaciji aktivnosti za 51. Svjetsko vojno prvenstvo u skijanju

Ova godina rezultirala je i učešćem OS BiH u mnogobrojnim projektima popravke i sanacije makadamskih puteva (u šest opština), popravci škola i dr.

Nažalost, BiH je još uvijek zagađena sa velikim brojem mina. Dosadašnja planirana dinamika realizacije deminiranja za 2010. godinu upućuje da će se predviđene površine pod minama, za ovaj period, očistiti.



Logističke operacije su u cjelosti podržavale i sve druge zadatke OS BiH od kojih su razdvajanje imovine koja će i dalje služiti za potrebe OS BiH i imovine koja će se vraćati entitetima kao višak za OS BiH, logistička podrška obuke i opremanje jedinice za mirovne misije te podrška obuci - neki od najznačajnijih.

Pored zadataka koji su težišno orijentisani na poboljšanje sistema OS BiH uopšte i saradnji sa drugim međunarodnim subjektima OS BiH su zabilježile i značajne sportske rezultate kako



Prva rotacija Pješadijske jedinice OS BiH u misiji ISAF

Jedinica Oružanih snaga BiH u misiji u Afganistanu

Ministar odbrane BiH dr. Selmo Cikotić



“Bosna i Hercegovina želi i može dati adekvatan doprinos zajedničkim naporima za uspostavljanje i očuvanje mira i stabilnosti u svijetu, te iz tog razloga smatram neophodnim da i naši pripadnici učestvuju u misijama. Dosadašnja iskustva potvrđuju učinjeni napredak procesa implementacije reformskog procesa u oblasti odbrane, čime se stvaraju bolji preduvjeti i povećava kredibilitet u nastojanjima za pristupanje BiH evroatlantskim institucijama. Da bi BiH postala članicom NATO-a, mora pokazati da je sposobna da dijeli rizike i teškoće operacija podrške miru, ali i drugih mehanizama kolektivne sigurnosti, što je suština NATO-a. Naši pripadnici koji su do sada bili u misijama, Oružane snage BiH i Bosnu i Hercegovinu predstavili su na najbolji mogući način, a svojom spremnošću i obučenošću dokazali da se mogu nositi i sa najvećim izazovima u izuzetno teškim uvjetima. Rezultat je to zajedničkog napora i rada svih onih koji su uključeni u proces napretka odbrambene reforme, kao i ostvarene želje da od zemlje kojoj je bila potrebna vojna pomoć dođe u poziciju da drugima pruža sigurnosne uvjete”.

obuka ne može u potpunosti zamijeniti. Ovo pripadnike Oružanih snaga BiH koji su učestvovali u operacijama podrške miru čini nemjerljivo spremnijim za uspješno obavljanje zadataka u budućnosti. U najširem smislu, Bosna i Hercegovina je okrenuta integracijama koje joj mogu garantovati bezbjednost, stabilnost i prosperitet. U svijetu u kojem živimo, ove vrijednosti ne dolaze besplatno, a nijedna zemlja, pa ni Bosna i Hercegovina, ne mogu birati valutu u kojoj će ove vrijednosti platiti. Igranjem aktivne uloge i preuzimanjem odgovornosti na međunarodnoj sceni, sebe činimo kredibilnim partnerom kolektivne i kooperativne bezbjednosti. Alternativa, u kojoj bi BiH pokušala biti ostrvo, cjelina sama sebi dovoljna, bi bila i skuplja i dokazano neuspješna na duge staze“.

Zamjenik ministra odbrane BiH za politiku i planove Živko Marjanac



“Osim što, kao višegodišnji primalac međunarodne pomoći, Bosna i Hercegovina sada ima moralnu obavezu da bude spremna da aktivno učestvuje u operacijama podrške miru na drugim mjestima u svijetu, želio bih istaći i praktične dimenzije učešća. Učešćem u operacijama podrške miru pripadnici Oružanih snaga BiH stiču stvarno iskustvo koje čak ni najkvalitetnija

obuka ne može u potpunosti zamijeniti. Ovo pripadnike Oružanih snaga BiH koji su učestvovali u operacijama podrške miru čini nemjerljivo spremnijim za uspješno obavljanje zadataka u budućnosti. U najširem smislu, Bosna i Hercegovina je okrenuta integracijama koje joj mogu garantovati bezbjednost, stabilnost i prosperitet. U svijetu u kojem živimo, ove vrijednosti ne dolaze besplatno, a nijedna zemlja, pa ni Bosna i Hercegovina, ne mogu birati valutu u kojoj će ove vrijednosti platiti. Igranjem aktivne uloge i preuzimanjem odgovornosti na međunarodnoj sceni, sebe činimo kredibilnim partnerom kolektivne i kooperativne bezbjednosti. Alternativa, u kojoj bi BiH pokušala biti ostrvo, cjelina sama sebi dovoljna, bi bila i skuplja i dokazano neuspješna na duge staze“.

Pješadijska jedinica Oružanih snaga BiH 21.10.2010. godine stigla je u Afganistan, gdje je počela sa izvršenjem zadataka u misiji ISAF. Dolasku je prethodio četverodnevni boravak u Danskoj, gdje su bile provedene završne planske aktivnosti za izvršenje ove misije.



Pripadnici jedinice Oružanih snaga BiH će vršiti unutrašnje osiguranje dvije NATO baze u provinciji Helmand koja se nalazi na jugozapadu Afganistana. Inače, u misiji ISAF Pješadijska jedinica OS BiH, koja broji 45 pripadnika, djeluje u sastavu danskog kontigenta sa mandatom u trajanju od šest mjeseci. Odlazak u misiju je dobrovoljan.

Podsjetimo ovom prilikom na samo neke od aktivnosti preduzetih u ranijem periodu, a koje se odnose na slanje Pješadijske jedinice OS BiH u ISAF. Naime, Ministarstvo odbrane BiH 18.03.2010. godine dostavilo je Predsjedništvu BiH Informaciju o mogućnosti angažovanja jedinica Oružanih snaga BiH u misiju Snage međunarodne sigurnosne pomoći u Afganistanu. Ministarstvo odbrane BiH je predložilo da Predsjedništvo BiH donese zaključak kojim će dati saglasnost na ovu informaciju, te da Ministarstvo odbrane BiH dobije mandat i obavezu da vodi pregovore i realizuje pripreme za upućivanje. Na 44. sjednici održanoj 14.04.2010. godine, Predsjedništvo BiH je i dalo saglasnost za angažovanje Pješadijske jedinice za osiguranje u misiji ISAF u Afganistan, u sastavu Danskog kontigenta u Regionalnoj komandi Jug. Zadužilo je MO BiH da okonča razgovore sa Oružanim snagama Kraljevine Danske i strukturama NATO saveza u vezi učešća jedinice OS BiH ovoj misiji. U skladu sa zaključkom Predsjedništva BiH, ministar odbrane BiH je 15.04.2010. godine uputio pismo namjere Vrhovnoj komandi savezničkih snaga za Evropu (SHAPE) o spremnosti BiH da učestvuje sa jedinicom za osiguranje u misiji ISAF u Afganistanu. Komandant Vrhovne komande savezničkih snaga za Evropu (SACEUR), admiral James G. Stavridis uputio je pismo Ministarstvu odbrane BiH 18.06.2010. godine, u kojem se zahvaljuje na planu BiH da poveća broj snaga u Afganistanu, te dao punu podršku BiH na daljem putu ka prijemu u punopravno članstvo u NATO savezu.

Ministarstvo odbrane BiH je u skladu sa članom 4. Zakona o učešću pripadnika OS BiH, policijskih službenika, državnih službenika i ostalih zaposlenih u operacijama podrške miru i drugim aktivnostima u inozemstvu, pribavilo elemente od nadležnih organa za ocjenu opravdanosti učešće jedinice OS BiH u misiji ISAF u Afganistanu.

Operativna Komanda OS Kraljevine Danske uputila je ekspertni tim u BiH, koji je boravio od 29.06. do 01.07.2010. godine s ciljem priprema, obuke i rješavanja administrativnih pitanja za upućivanje jedinice OS BiH u sastav danskog kontingenta. Predsjedništvo BiH je na svojoj 48. sjednici, održanoj 27.07.2010. godine, na prijedlog Vijeća ministara BiH, donijelo Odluku o upućivanju 45 pripadnika Oružanih snaga BiH u misiju ISAF. Predsjedništvo je Odluku uputilo Parlamentarnoj skupštini BiH, Predstavničkom domu, radi potvrđivanja, a Predstavnički dom je na 82. sjednici 28.07.2010. godine i potvrdio Odluku.

U našoj zemlji od 19.08. do 02.09.2010. godine boravio je ekspertni tim OS Kraljevine Danske sa ciljem obuke i certifikacije jedinice OS BiH za učešće u misiji ISAF. Izvođenjem Evolucijske vježbe pod nazivom "HOT SUMMER", te nakon opsežnih priprema, 01. 09. 2010. godine izvršeno je završno certifikovanje jedinice privremenog sastava (70 pripadnika) OS BiH za odlazak u misiju ISAF.

Dom naroda Parlamentarne skupštine BiH na sjednici održanoj 01.09. 2010. godine potvrdio je Odluku o upućivanju pripadnika Oružanih snaga BiH u misiju ISAF u Afganistanu.

U vojnoj bazi Dubrave kod Tuzle 15. 10. 2010. godine održan je svečani ispraćaj Prve rotacije Pješadijske jedinice Oružanih snaga BiH u Afganistan.

Osposobljenost, visoka motiviranost i discipliniranost pripadnika OS BiH



Izvođenjem Evolucijske vježbe pod nazivom "HOT SUMMER", te nakon opsežnih priprema, 01. 09. 2010. godine izvršeno je završno certifikovanje jedinice privremenog sastava (70 pripadnika) OS BiH za odlazak u misiju ISAF. Certifikaciju je izvršio ekspertni tim Oružanih snaga Kraljevine Danske, u čijem sastavu je Odlukom Predsjedništva BiH planirano upućivanje jedinice OS BiH u misiju.

Ekspertni tim Oružanih snaga Kraljevine Danske je tokom izuzetno dobro osmišljene i realizirane evolucijske vježbe, po scenariju planirane misije, ocijenio da su svi pripadnici i jedinica OS BiH u potpunosti osposobljeni za izvršenje svih zadataka i potrebnih procedura za osiguranje Vojne baze koalicionijskih snaga u Afganistan. Poseban utisak na ekspertni tim, pored stručne i psiho-fizičke osposobljenosti, ostavili su visoka motiviranost i discipliniranost pripadnika jedinice OS BiH. Naravno, ovako visoke ocjene osposobljenosti plod su svih dosadašnjih planskih aktivnosti koje je 5. pbr. tokom 2009. i 2010. godine preduzimala u pripremi za misiju ISAF. Motiviranost i osposobljenost za izvršenje misije povezana je sa velikim brojem pripadnika OS BiH, koji su se isključivo dobrovoljno prijavili za izvršenje misije. Pored toga, najveća ocjena osposobljenosti je i rezultat napora i aktivnosti koje je preduzimalo MO i OS BiH, kao i Komanda 5.pbr OS BiH.

Ovom aktivnošću zaokružene su sve planirane pripreme za upućivanje vojnika OS BiH u misiju ISAF, tako da je jedinica mogla krenuti na izvršenje ove složene misije.

Zamjenica ministra odbrane BiH za upravljanje resursima Marina Pendeš



„Upućivanje pripadnika Oružanih snaga BiH u ISAF misiju u Afganistan predstavlja nastavak sudjelovanja naše zemlje u operacijama potpore miru, nakon prosinca 2008. godine, kada je završen angažman u Iraku. Bosna i Hercegovina želi postati članicom NATO-a, a što je utemeljeno zakonskim rješenjima, obvezama i opredijeljenosti ka članstvu u NATO i euroatlantske integracije.

Dodatni snažan argument za uključivanje u ISAF misiju pod vodstvom NATO-a je činjenica da, sudjelujući u operaciji ISAF, pripadnici Oružanih snaga BiH imaju prigodu učiti i usavršavati se rame uz rame s najboljim i najpripremljenijim oružanim snagama svijeta, te tako stjecati iskustva koja će im koristiti po povratku u zemlju, ali i u budućnosti, na zajedničkim aktivnostima u okviru članstva u NATO savezu.

Pripadnici Oružanih snaga BiH su dobro opremljeni i obučeni za kvalitetno obavljanje zadataka u misiji, a prema rezultatima postignutim na obuci, pripremljeni i osposobljeni za sve zahtjeve i izazove sa kojima će se susretati u Afganistanu. Aktivnosti kroz koje je prošla postrojba koja je upućena u Afganistan, potvrda su profesionalnog izvršavanja zadataka koje se daju Oružanim snagama BiH. Vjerujem da će naši pripadnici u Afganistanu časno i dostojanstveno predstavljati Bosnu i Hercegovinu i Oružane snage BiH, da će biti sposobni i odgovorni u izvršenju bilo koje zadatke koja se pred njih postavi, te da će biti najbolji promotori Bosne i Hercegovine.“

Načelnik Zajedničkog štaba OS BiH general pukovnik Miladin Milojević



„Učešće OS BiH u misiji u Afganistanu i sličnim misijama, potvrđuje spremnost OS Bosne i Hercegovine da ravnopravno učestvuju sa saveznicima i partnerima u izvršavanju vrlo složenih i odgovornih zadataka u misijama kolektivne bezbjednosti. Učešćem u operacijama podrške miru na najbolji način se testira i uvećava nivo interoperabilnosti i kompatibilnosti OS BiH

sa oružanim snagama zemalja članica NATO, te stiče veoma značajno iskustvo u pripremi i izvršenju veoma kompleksnih zadataka izvan zemlje.

Gledajući u ne tako davnu prošlost kroz učešće OS BiH u dosadašnjim misijama uviđa se sljedeće: sve misije su uspješno realizovane; iskustva koja smo stekli kroz dosadašnje misije u mnogočemu će nam pomoći u pripremi narednih misija; uspješnim izvršavanjem dosadašnjih misija stekli smo povjerenje među partnerima što je potvrđeno pozivom za učešće u misiji ISAF; pojedinci i jedinice OS BiH su profesionalno i odgovorno realizovale zadatke što nam je potvrđeno u neposrednim kontaktima sa snagama u kojima su OS BiH realizovale svoje misije.

Učešćem pješadijske jedinice na zadacima unutrašnjeg obezbjeđenja baze Koalicionijskih snaga u misiji ISAF u Afganistanu, praktično, na terenu, pokazujemo našu spremnost da održimo kontinuitet učešća u operacijama kolektivne bezbjednosti.

Uz podršku domaćih institucija i inostranih partnera smatramo da će i ovu misiju OS BiH realizovati uspješno.“

Ispraćaj Pješadijske jedinice OS BiH u Afganistan

U vojnoj bazi Dubrave kod Tuzle 15. 10. 2010. godine održan je svečani ispraćaj Prve rotacije Pješadijske jedinice Oružanih snaga BiH u Afganistan.

Uz pripadnike kontingenta i članove njihovih porodica, svečanom ispraćaju prisustvovali su najviši predstavnici Ministarstva odbrane i Oružanih snaga BiH, parlamentarni vojni povjerenik Boško Šiljegović, predstavnici NATO štaba, EUFOR-a i OSCE-a u BiH, predstavnici Danske ambasade u BiH, kao i vojno-diplomatski predstavnici stranih zemalja akreditovanih u BiH.

Pripadnicima jedinice, gostima i zvaničama obratili su se zamjenica ministra odbrane BiH Marina Pendeš, načelnik Zajedničkog štaba Oružanih snaga BiH general-pukovnik Miladin Milojević, te komandant 5. pješadijske brigade brigadni general Senad Mašović. U prigodnom obraćanju zamjenica ministra odbrane BiH Marina Pendeš rekla je da su sve aktivnosti kroz koje je prošla ova jedinica potvrda profesionalnog izvršavanja zadataka koje se daju OS BiH, a koje su bazirane na zakonskim rješenjima i obavezama i opredijeljenosti BiH ka članstvu u NATO i evroatlantskim integracijama. Zamjenica ministra Pendeš je posebno naglasila da je „prema rezultatima koje su pripadnici ove jedinice postigli na obuci, ova jedinica, pripremljena, osposobljena i obučena za sve zahtjeve i izazove sa kojima će se susretati u Afganistanu“, te da je „ova jedinica pokazala da je profesionalna i da će časno i dosljedno predstavljati OS BiH.“



Načelnik Zajedničkog štaba OS BiH general-pukovnik Miladin Milojević rekao je da učešćem u misiji ISAF „Oružane snage BiH i Bosna i Hercegovina kao država, pokazuju spremnost za evroatlantske integrativne procese i daju doprinos kolektivnoj sigurnosti u svijetu“. General Milojević je istakao da obuka pripadnika OS BiH poslije završetka angažovanja u Iraku nije prekidana, te da se „u ovoj jedinici nalaze ljudi koji su vojnički, fizički i psihički zdravi i koji su ispunili sve kriterijume, prolazeći kompletnu i zahtjevnu obuku za izvršavanje misije.“

Komandant 5. pješadijske brigade OS BiH brigadni general Senad Mašović rekao je da je u suštini ovo prva borbena jedinica koja ide u misiju.

„Do sada smo imali individualna angažovanja, ali sada upućujemo po prvi put borbenu jedinicu koja ima konkretnu misiju i konkretan zadatak da se angažuje na obezbjeđivanju dijela baza koalicionih snaga u provinciji Helmand, u sastavu danske borbene grupe“, rekao je Mašović. Kako je naglasio general Mašović, „proces obuke odvijao se u više faza, sadržaj obuke je kompatibilan sa obukom pripadnika oružanih snaga zemalja članica NATO, a svi pripadnici jedinice su osposobljeni za pojedinačne i kolektivne zadatke u okviru misije.“

Na kraju, general Mašović je istakao očekivanje da će pripadnici ove jedinice biti istinski ambasadori Bosne i Hercegovine u cjelini.



Iskustva iz misije u Afganistanu:

Misija - prilika da vojnik naučeno primijeni u realnim ratnim uslovima



Pukovnik Taib Karaica na dužnosti je načelnika odjeljenja u Upravi za logistiku ZŠ OS BiH. Bio je u misiji u Afganistanu (ISAF), u zoni odgovornosti Regionalne Komande Sjever u okviru njemačkog kontingenta (kamp Marmal, grad Mazar-e Sharif), od septembra 2009. do marta 2010. godine. Obavljao je poslove i zadatke štabnog oficira u CJ-5 (dugoročno planiranje), a uporedo s tim i šef Prvog bosansko-hercegovačkog kontingenta (BIHCON-1), te nacionalni predstavnik BiH.

Prema njegovim riječima, angažovanje oficira BiH u misiji ISAF treba posmatrati u kontekstu obaveze BiH i njenih oružanih snaga da aktivno učestvuju u operacijama kolektivne sigurnosti i operacijama podrške miru. "Prevashodan cilj misije BIHCON-1 bio je dati svoj stručni doprinos radu RK Sjever na različitim štabnim pozicijama u okviru komande koje su bile dodijeljene našim oficirima, te time pokazati da su pripadnici OS BiH osposobljeni za rad u sofisticiranom i multinacionalnom okruženju. Sudeći prema pojedinačnim službenim ocjenama pripadnika BIHCON-1, koje smo dobili od naših pretpostavljenih starješina, mi smo svoje zadatke izvršili izuzetno uspješno i time na najbolji mogući način promovisali svoju državu. Naše rezultate svakako treba staviti u kontekst opštih napora BiH da postane dio euroatlantskih integracija i oni nedvojbeno imaju pozitivne refleksije na ova nastojanja", ističe pukovnik Karaica.

Govoreći o motivaciji za odlazak u misiju, kaže da se ona kod naših oficira ne razlikuje od motivacije profesionalnog vojnika iz bilo koje druge države: "Neovisno o tome iz koje zemlje dolaze, motivacijski faktori se mogu generalno predstaviti kao skup pro-

fesionalnih izazova podržan patriotskim i finansijskim interesima. Kod profesionalnih izazova prije svega mislim na rad u ratnim uslovima, realizaciju široke lepeze raznovrsnih zadataka, multinacionalno okruženje, obogaćivanje znanja, umijeća i vještina, sticanje neprocjenjivog iskustva itd. Patriotski motiv u našem slučaju jeste nesumnjivo davanje svog direktnog doprinosa naporima države na putu ka NATO-u i EU, dok je finansijski motiv relativna kategorija. Naime, misljenja sam da je, prije svega, profesionalno i privatno iskustvo koje čovjek ponese sa sobom iz misije trajna kategorija i ispred materijalnog faktora".

Iznoseći lične impresije o boravku u Afganistanu, pukovnik Karaica naglašava kako je misija za profesionalnog vojnika definitivno najbolja prilika da naučeno primijeni u realnim ratnim uslovima, pri tome upotpunjujući svoje znanje i stičući profesionalno i životno iskustvo. "Starješine iz BiH nemaju niti najmanji razlog da se osjete inferiornim pred oficirima stranih vojski kada je u pitanju osposobljenost. Međutim, ono što smo mogli svi naučiti jeste da pored osposobljenosti ključ uspjeha leži u inicijativi i proaktivnom pristupu u rješavanju problema. Čim više, imao sam priliku da čujem kako potčinjene starješine ozbiljno negoduju kod svog pretpostavljenog zbog njihove nedovoljne iskorisćenosti, zbog malog broja dodijeljenih zadataka, da traže čak premještaj na formacijska mjesta gdje će imati više posla. Inače, gotovo fascinantno je bilo funkcionisanje cjelokupne prilično glomazne organizacije multinacionalnog štaba koji je na sve situacije imao adekvatan i najbrži mogući odgovor. Pri tome su visoka profesionalnost,

predanost poslu, inicijativa i fleksibilnost ključne riječi koje ponajbolje opisuju cijeli sistem. S druge strane, ja sam imao sreću pa sam mnogo vremena proveo sarađujući sa afganistanskim oficirima i tu mnogo naučio o njihovoj kulturi, pristupu rješavanju problema, plemenskim i vjerskim običajima itd. Za sticanje takvog iskustva bi vrijedilo platiti, a ja sam uz to bio još i plaćen".

Ono što će našem sagovorniku posebno ostati u sjećanju jeste vanredno odsustvo zbog smrti u porodici: "Samo nakon par sati po saznanju, bio sam u njemačkom transportnom vojnom avionu koji je letio od Mazar-e Sharifa do Uzbekistana (grad Termez) samo radi jednog putnika - mene. U Uzbekistanu je na pisti čekao drugi njemački MEDEVAC, avion koji je pored posade imao dva putnika - povrijeđenog njemačkog vojnika i mene. Nevjerovatno je da sam za svega osam sati bio evakuisan iz Mazar-e Sharifa u Keln, što govori o izvanrednoj organizovanosti vojnog sistema".

Upitan da li bi opet išao u neku od misija, te šta bi savjetovao drugima koji su zainteresirani za misije, Karaica kaže: "Iako je misija u Afganistanu izuzetno zahtjevnja i naporna, vrlo rado bih se odazvao sljedećem pozivu. Istina, ne ovoga trena, jer je potrebno izvjesno vrijeme da čovjek izbalansira nakupljene stresove, da popuni izgubljeni vremenski prostor zbog razdvojenosti od svojih najdražih, te se povrati u životnu svakodnevnicu. Svima onima koji su zainteresovani za misije poručujem da to svakako urade, jer od toga mogu imati više-struke koristi, kako sam već to ranije i opisao. Naravno, pri tome moraju biti spremni na sve neželjene situacije i opasnosti koje naša profesija nosi sa sobom".

Ono što posebno želi izdvojiti jeste obilježavanje Dana OS BiH u Afganistanu: "To je nešto što će pamtili svi pripadnici BIHCON-1, ali i sve zvanice koje su bile prisutne na proslavi, od komandanta RK Sjever, njegovih zamjenika, načelnika štaba, preko čelnih štabnih oficira, načelnika J-tova, pa do naših dragih stranih radnih kolega iz različitih organizacionih cjelina u kojima smo bili angažovani. Uspjeli smo da u improvizovanim ratnim uslovima promovisemo kako Oružane snage BiH, tako i državu u cjelini.

Otvorenog smo srca prihvatili sve goste, i ova proslava je nešto što se još dugo u kampu Marmal spominjalo kao primjer dobre organizacije, promocije i druženja", ističe Karaica.

Intervju - komandant NATO štaba u Sarajevu brigadni general David Enyeart:

Pripadnici Oružanih snaga BiH na najbolji način će predstaviti svoju zemlju



Generale Enyeart, koliko je, po vašem mišljenju, važno učešće pripadnika OS BiH u mirovnim misijama izvan zemlje? Možete li nam, takođe, reći svoje mišljenje o misiji ISAF u Afganistanu i učešću pripadnika OS BiH u toj misiji?

Učešće bosanskohercegovačkih jedinica u operacijama podrške miru je vrlo važno iz dva razloga: Prvo, učešće snaga jedne države u operaciji suprostavljanja međunarodno prepoznatoj sigurnosnoj prijetnji među najboljim je načinima da se pokaže i volja i sposobnost da se doprinese međunarodnoj sigurnosti. Sposobnost da se to uradi jeste jedna od stvari koje NATO očekuje od budućih članica. U osnovi, saveznici će očekivati od institucija Bosne i Hercegovine da budu u stanju razmjestiti snage kao kredibilan i kompatibilan doprinos međunarodnoj sigurnosti. Drugo, kad vojnici i vojne organizacije iz nekoliko različitih zemlja sarađuju u jednom dužem periodu u zahtjevnom okruženju, steknu



dragocjena iskustava koja mogu koristiti da unaprijede svoje buduće operacije i oružane snage u cjelini. Često čujem od predstavnika saveznika kako je učešće u operacijama koje predvodi NATO doprinijelo većem profesionalizmu unutar njihovih vojnih struktura.

NATO pozdravlja odluku BiH da pošalje svoje vojnike u ISAF u 2009.g. i cijeni što je BiH to svoje opredjeljenje proširila u 2010. godini. Siguran sam da će razmješteni

pripadnici OS BiH doprinijeti ukupnoj misiji ISAF-a i na najbolji način predstaviti svoju zemlju.

Obuka pripadnika OS BiH koju provodi EUFOR u koordinaciju sa NŠSa započela je ovog mjeseca u Travniku. Kakav je Vaš komentar na ovo i hoće li biti još slične obuke?

Sa novim proširenim mandatom, koji sada obuhvata obuku i mentorstvo OS BiH, EUFOR je uveo mobilne timova za obuku u opća nastojanja na izgradnji vojnih sposobnosti na taktičkom nivou. Ovaj pristup za cilj ima unaprijediti sposobnost instruktora OS BiH da obučavaju svoje vojnike u skladu sa NATO standardima. Mi to nazivamo „obukom obučavatelja“. Ovaj novi zadatak EUFOR-a nadopunjuje jedan od glavnih zadataka mog štaba, a to je razvoj odbrambenih sposobnosti BiH. Mislim da ova obuka jasno pokazuje praktičnu sinergiju napora EUFOR-a, NATO-a i OS BiH, a saradnju ćemo nastaviti i u budućnosti.



Saradnja MO i OS BiH i NATO štaba u Sarajevu

Bosna i Hercegovina ima svijetlu budućnost u NATO-u

Kakvi su vaši utisci i razmišljanja o prethodnim rezultatima iz misija?

BiH je već učestvovala u nizu međunarodnih misija širom svijeta, od pojedinaca pod okriljem UN-a do specijalizirane jedinice za uništavanje MES-a u okviru koalicije u Iraku.

Sve je to doprinijelo izgradnji percepcije BiH kao kredibilnog sigurnosnog faktora; kao što se to često kaže, BiH je prešla put od potrošača međunarodne sigurnosti do države koja doprinosi međunarodnoj sigurnosti.

Učešće u ISAF misiji će ovu percepciju dodatno ojačati.

Kako ocjenjujete gotovost i obučenost pripadnika OS BiH koji su već ili će biti razmješteni u misije u predstojećem periodu?

Pješadijska jedinica koja je nedavno razmještena u Afganistan sa Danskim kontingentom prošla je kroz ciljni program obuke ovdje u BiH.

Moje osoblje je pratilo tu obuku i bili su impresionirani onim što su vidjeli. Peta pješadijska brigada sa komandom u Tuzli uradila je odličan posao na obuci, što je certifikacija koju su Danci uradili jasno pokazala.

Danski KoV certificirao je ovu jedinicu po istim standardima koje primjenjuju na svoje vlastite jedinice za osiguranje, i evidentirao neznatne nedostatke.

Koliko sam shvatio, ti nedostaci će se, za one koji su već razmješteni, riješiti kroz dodatnu obuku na samom terenu, a paket obuke za sljedeću rotaciju će staviti više naglaska na te aspekte. NŠSa će, naravno, nastaviti podržavati ovaj proces.

Kako ocjenjujete ukupnu saradnju između NATO štaba u Sarajevu i Ministarstva odbrane BiH i Oružanih snaga BiH?

NŠSa je ovdje prisutan od novembra 2004. g. i odigrao je bitnu ulogu u razvoju jedinstvenih oružanih snaga koje postoje od 1. januara 2006. g. Naš odnosi sa MO BiH i sa OS BiH uvijek se temeljio na međusobnom poštivanju. Kao najviši vojni predstavnik NATO-a u BiH, redovno održavam sastanke sa ministrom odbrane i načelnikom Zajedničkog štaba, a taj naš bliski radni odnos dalje se prelijeva i na ostalo osoblje u institucijama odbrane i savjetnike među mojim osobljem. Mi nismo ovdje da bismo BiH rekli što joj je činiti, već da joj pomognemo pronaći rješenja koja će funkcionirati u NATO kontekstu, i na taj način pomoći BiH da pristupi Savezu. Mi smo ovdje resurs koji stoji na raspolaganju vašim čitateljima i pozivam ih da nas koriste. Ovdje smo da bismo pomogli.



Organizacije međunarodne zajednice koje su aktivno učestvovala u procesu reforme odbrane u Bosni i Hercegovini složile su se 2004. godine da će u narednim godinama NATO preuzeti odgovornost za podršku procesu reforme odbrane u BiH.



Zemlje članice NATO-a formalno su preuzele ovu odgovornost na samitu NATO-a u Istanbulu, 2004. godine, kada je donesena odluka o formiranju NATO štaba Sarajevo (NHQSa/NŠSa), kao jednog od dva pravna sljednika SFOR-a (drugi pravni sljednik je EUFOR). NATO štab Sarajevo zvanično je uspostavljen 1. decembra 2004. godine, sa mandatom da „savjetuje vlasti Bosne i Hercegovine u oblasti reforme odbrane, uključujući i koordinaciju aktivnosti vezanih za članstvo u Partnerstvu za mir (PfP), kako bi se pružila podrška daljnjim euroatlantskim integracijama“. Također, politički savjetnik NATO štaba Sarajevo imao je ulogu kopredsjedavajućeg Komisije za reformu odbrane, zajedno sa tadašnjim ministrom odbrane Nikolom Radovanovićem (Komisiju je 2003. godine formirao Visoki predstavnik, a nastavila je sa radom i 2004. i 2005. godine).

Tokom 2005. godine, osoblje NATO-a je, zajedno sa zvaničnicima BiH i predstavnicima međunarodne zajednice, radilo

u okviru Komisije za reformu odbrane i njenim podkomisijama kako bi se došlo do najboljih rješenja za buduće OSBiH i MO BiH, koja su, istovremeno, kompatibilna sa NATO-om. Pružali su političku, analitičku, konceptualnu i pravnu pomoć i pomogli u procesu postizanja konsenzusa po različitim kompleksnim pitanjima kojima se bavila Komisija za reformu odbrane. Također, nastojali su prenijeti standarde, principe i najbolja iskustva iz zemalja članica NATO-a.

Mandat Komisije za reformu odbrane okončan je krajem 2005. godine, a od januara 2006. godine, kada je na snagu stupio novi Zakon o odbrani BiH, Bosna i Hercegovina preuzela je vodeću ulogu u razvoju sopstvenog sistema odbrane na putu ka članstvu u NATO-u. NŠSa je nastavio služiti kao vanjski resurs na koje se BiH po potrebi može osloniti. Vrlo bliska saradnja nastavila se i u narednim godinama, a NŠSa je pružao i finansijsku i stručnu pomoć u procesu implementacije novog sistema odbrane.

Od pristupanja Partnerstvu za mir (PfP), u decembru 2006. godine, BiH je nastavila produbljivati saradnju sa NATO-om kroz učešće u različitim i s vremenom sve širim i zahtjevnijim programima Partnerstva za mir. NATO štab Sarajevo nastavlja pružati podršku Bosni i Hercegovini u ovome procesu kroz zajednički rad sa različitim institucijama po pitanjima vezanim za pristupanje NATO-u. Jednako tako, spremni su podržati aktivnosti u okviru Akcijskog plana za članstvo kada se 69 perspektivnih vojnih lokacija za potrebe odbrane uknjiže na Bosnu i Hercegovinu, kako je to navedeno u odluci zemalja članica NATO-a. „Bosna i Hercegovina ima svijetlu budućnost u NATO-u, a NATO štab u Sarajevu je spreman pomoći da se taj cilj ostvari“, poruka je iz NATO štaba u Sarajevu.

Učešće pripadnika OS

Od 2006. godine pripadnici OS BiH su učestvovali u dvije UN misije, i to: UNMEE - Misija Ujedinjenih naroda u Eritreji/Etiopiji i MONUSCO - Misija Ujedinjenih naroda u Demokratskoj Republici Kongo.

U misiji Ujedinjenih naroda u Eritreji/Etiopiji od januara 2006.godine do maja 2008.godine učestvovalo je ukupno 14 pripadnika OS BiH. Ova misija je rezolucijom Vijeća sigurnosti UN završena u mjesecu julu 2008.godine. U Misiji Ujedinjenih nacija MONUC, sadašnji naziv MONUSCO u Demokratskoj Republici Kongo od januara 2006.godine do avgusta mjeseca 2010. godine, učestvovalo je ukupno 20 pripadnika OS BiH. Trenutno se u misiji nalazi pet pripadnika OS BiH.

Iskustva iz misije u Etiopiji i Eritreji – UNMEE

Obaveza je vojnika služiti u cilju globalne sigurnosti

Major Nermin Hasić na dužnosti je oficira za mirovne operacije u ZŠ OS BiH. Od 07. 03. 2007. do 07.03. 2008. godine bio je u misiji Ujedinjenih naroda u Etiopiji i Eritreji – UNMEE. Etiopija i Eritreja nekada su bile jedna država, a 24. 05. 1993. godine Eritreja je stekla neovisnost. "Nakon rata između ove dvije države, u Alžiru je 2000. godine potpisan sveobuhvatni Mirovni sporazum, kojim su se strane obavezale na „trajni prekid neprijateljstava“, kao i uspostavu neutralne granične komisije za razgraničavanje. Duž granice formirana je privremena sigurnosna zona, a jedan od osnovnih zadataka vojnih posmatrača u misiji je bio nadgledanje prekida neprijateljstva i privremene zone sigurnosti u cilju implementacije sporazuma, patroliranje u dodeljenim zonama, izvještavanje, kao i koordinacija sa nevladinim organizacijama“, podsjeća Hasić. Prema njegovim riječima pripadnici kontingenta OS BiH su bili razmješteni na teritoriji Etiopije. Misija je trajala od 31. 07. 2000. do 31.07. 2008. godine. Prvi vojni posmatrač iz BiH je otišao u ovu misiju u januaru 2001.godine, a već u februaru smo imali osam vojnih posmatrača. Misija je od 30. 01. 2008. godine produžena do 31.07. 2008. godine, nakon čega je zatvorena, a osoblje je povučeno u matične države. "Ponosan sam što sam kao vojni posmatrač iz BiH učestvovao u ovoj misiji", ističe Hasić.

Što se tiče njegovih motiva za odlazak u misiju, kaže da ih je bilo više: "Jedan od najizraženijih motiva je bilo saznanje da su unazad nekoliko godina oficiri iz raznih zemalja svijeta dolazili u našu zemlju u cilju pomoći stvaranju i očuvanju mira, što mi je davalo dodatnu snagu da i mi možemo nekome pomoći. Ne treba zaboraviti na motivisanost za rad u međunarodnom okruženju, jer su u misiji participirali oficiri iz 55 zemalja svijeta, a ne manje važan i bitan je i finansijski aspekt".



Hasić tvrdi da učešće u mirovnoj misiji za njega predstavlja ogromno iskustvo, jer raditi u internacionalnom okruženju kakvo je u UN-u veliki je izazov, na ličnom i profesionalnom planu: "Život i rad s ljudima različitih običaja, boje kože, ponašanja, kultura, zaista predstavlja ogromno i dragocjeno bogatstvo. Pošto sam tokom misije bio i Tim lider, imao sam više prilike da se susrećem sa lokalnim stanovništvom, a i s međunarodnim osobljem koje radi u misiji. Saradnja sa lokalnim stanovništvom bila je na veoma visokom nivou i smatram je jednom od najvažnijih elemenata za uspješan završetak misije. I saradnja sa pripadnicima misije iz drugih zemalja je bila veoma dobra. Pogotovo se to može vidjeti na Tim sajtozima, jer na većini njih posmatrači provode 24 sata zajedno. Ukratko rečeno, nakon misije postao sam zadovoljniji svojim životom, i mogu reći počeo sam i razmišljati na drugi način".

Na kraju razgovora, između ostalog, Hasić poručuje: "Išao bih ponovo u misiju, a iskreno se nadam da i hoću. Mislim da je u današnje vrijeme obaveza vojnika služiti u cilju globalne sigurnosti, kako u svojoj, tako

i u drugim zemljama širom svijeta. Naravno, dobro je ako se ta obaveza može usaglasiti kako na profesionalnom, tako i na ličnom planu. Imati udjela u doprinosu stvaranja ili očuvanja mira bilo gdje u svijetu, smatram nešto najvrednijim što vojnici mogu imati tokom svoje karijere. Ne treba zaboraviti da su i drugi vojnici bili ovdje kod nas. Htio bih takođe naglasiti da svih pet pripadnika kontingenta OS BiH koji su bili u ovoj misiji, dostojanstveno su predstavljali BiH OS BiH, pokazali profesionalnost i stručnost u radu, kao i jednu izvanrednu homogenost, tako da su vojni posmatrači iz drugih zemalja govorili da bi i njihovi kontingenti trebali biti onakvi kao što su iz naše države.

Smatram da bi bilo veoma korisno proširiti učešće pripadnika OS BiH u misijama UN, čime bi pokazali da BiH daje podršku Organizaciji UN-a u realizaciji operacija podrške miru i jasno iskazuje opredjeljenje da, kao odgovorna članica međunarodne zajednice, želi i može dati adekvatan doprinos zajedničkim naporima za uspostavljanje i očuvanje mira i stabilnosti u svijetu".

BiH u UN misijama

Iskustva iz UN misije - Kongo

Vojni posmatrač mora biti psihički jak i prilagodljiv

Major Željko Bradić na dužnosti je oficira za planiranje u ZŠ OS BiH. Do sada je učestvovao u dvije UN misije. U prvoj misiji bio je od 28.08.2003. do 12.09.2004. godine u Eritreji/Etiopiji, a u drugoj je učestvovao od 04. 03. 2009. do 05. 03. 2010. godine u Kongu. U poređenju sa prvom, kako kaže, misija u Kongu je mnogo veća i složenija, što se tiče mandata koji je Vijeće sigurnosti UN-a dalo MONUC misiji u Kongu. "To znači da UN snage mogu borbeno djelovati i nametati mir u skladu sa ukazanom potrebom i procjenom operativne situacije na terenu. To se odnosi na snage UN koje su naoružane i dolaze iz različitih zemalja koje participiraju u misiji. Mandat MONUC misije pokriva je širok spektar aktivnosti kao što su: očuvanje mira, sigurnost, operacije DDRRR, humanitarno djelovanje, zaštita djece i sve drugo što bi jedna država u duhu demokratije trebala da ima", kaže Bradić. Njegovi lični motivi za odlazak u mirovne misije, prije svega, bili su u ispunjavanju dužnosti kao oficira da participira u PSO misijama, jer se država BiH obavezala da će participirati u misijama. S druge strane, za njega je to bio veliki izazov - obavljati dužnosti oficira u međunarodnom okruženju i predstavljati zemlju na tom nivou. Iznoseći utiske iz ove zemlje Bradić kaže: "Naučio sam puno, naročito - raditi kao vojni posmatrač pod UN zastavom. U misiji MONUC broj vojnika posmatrača bio je 750 iz 42 zemlje svijeta. A raditi npr. u jednom timu na terenu koji broji sedam ljudi, gdje boravite 24 sata zajedno dijeleći prostor, hranu, toalet i slobodno vrijeme, vaše životne navike mijenjaju se za 360 stepeni i tome se morate prilagoditi. UN misija u Kongu je izuzetno velika, najveća misija UN-a u svijetu, broji oko 20.000 hiljada pripadnika UN-a plus lokalno stanovništvo koje radi za UN. Zemlja je ogromna, a infrastruktura uključujući puteve je izuzetno siromašna, tako da asfaltirane puteve možete samo naći u glavnom gradu i gradovima koji su centri provincija. Koliko je velika ova zemlja potvrdiću samo jednim primjerom. Nakon što sam stigao u glavni grad - Kinšasu i završio administrativne procedure, dobio naredbu i ime tima u koji treba da idem raditi, putovao sam avionom četiri sata, helikopterom jedan sat i vozilom 3,5 sati, da bih došao do svoga tima, gdje sam proveo šest mjeseci. Nije bilo telefona i interneta,



tako da sam se sa svojom porodicom komunicirao vrlo teško. Ovo govorim da Vam pokušam dočarati na šta sve vojni posmatrač mora biti spreman, a iznad svega mora, pored tjelesne spremne, biti izuzetno psihički jak i prilagodljiv".

"Kao vojni posmatrač saradnju sa lokalnim stanovništvom ostvarujete svakodnevno kroz patroliranja u zoni odgovornosti tima, razgovarate i evidentirate sve ono što je sigurnosno i interesantno, kao što su pljačke, pobunjeničke grupe, silovanja, bolest, epidemije, životni standard i dr., te kroz dnevno izvještavanje pokušavate da date sliku stanja na terenu Komandi misije, koja bi na osnovu tih informacija trebala djelovati. Saradnja sa ostalim pripadnicima UN-a, u većini slučajeva je bila na nivou profesionalnog odnosa i ispunjavanja obaveza u timu. Vrlo često dolazi do nesporazuma, naročito zbog komunikacije na engleskom jeziku, a kojeg mnogi ne znaju i ne razumiju. Ovo govorim i sa pozicije šefa tima koju sam obavljao šest mjeseci. Imao sam oficire iz Indije, Pakistana, Paragvaja, Zambije, Mongolije, Urugvaja i Nepala. Imena ovih zemalja vam govore da je razlika u kulturi, religiji, ishrani i običajima ogromna. Stoga je to uistinu veliko iskustvo, a niti jedan trening ili obuka ne može vas za to pripremiti. To morate doživjeti i proživjeti, kako biste vidjeli šta to ustvari znači". Posebno interesantnim, Bradić smatra što u Kongu postoji više stotina plemena. "Ovaj podatak pokazuje svu složenost sistema zemlje i stavljanja svakog dijela zemlje i navedenih plemena u integraciju demokratske države Kongo. Svako pleme ima šefa ili kralja po tradicionalnim zakonima koji još uvek vladaju, dok država pokušava da nametne demokratske zakone.

Nalazio sam se u situacijama kada tradicionalni i državni zakoni dolaze u sukob i kada tradicionalni kralj ne pristaje na državne zakone, nego provodi tradicionalne - kako ih on tumači. Policija i vojska ne mogu da se suprotstave istima jer većina stanovništva slijedi i vjeruje kraljevima, a ne demokratski izabranoj Vladi i njenim predstavnicima".

Na pitanje šta bi savjetovao drugima koji su zainteresovani za učešće u nekoj od misija, Bradić odgovara: "One koji imaju želju da idu u misije, ohrabrio bi ih da to i urade, ali im savjetujem da se edukuju kvalitetno, naročito na polju učenja engleskog jezika i druge obuke koja se organizuje u zavisnosti u koju misiju idete i za šta se spremate. Često dobijam pitanja da li je bilo opasno u misiji. Odgovaram da jeste i moraju da shvate da gdje god su UN snage rapoređene neki oblik sukoba postoji i "oružje zvecka". Međutim, posao profesionalnog vojnika je i rat i to dovoljno govori sve o opasnostima sa kojima se suočavaju oni koji idu u misije. Svi oni koji se odluče učestvovati u misijama moraju znati da je to jedan drugi svijet i okruženje kojem se vi morate prilagoditi, izvršiti svoje dužnosti i vratiti se kući porodicama. Do sada sam učestvovao u dvije misije i bilo je teških trenutaka, naročito zato što sam bio odvojen od porodice. Ali uspio sam jer sam za ono što radim imao bezrezervno razumijevanje i podršku moje supruge i troje dece. I na kraju, gdje god bili i predstavljali svoju zemlju i OS BiH, respektirajte domicilno stanovništvo, njihovu kulturu i običaje i pokušajte se uklopiti, jer samo tako ćete biti prihvaćeni i moći ispuniti svoju misiju i predstavljanje svoje zemlje u međunarodnom okruženju."

Iskustva iz misije u Iraku

Rijetka prilika vojnicima i podoficirima za sticanje iskustva



Zastavnik Ivo Lukačević na dužnosti je glavnog podoficira za operacije uništavanja NUS-a (Operativna Komanda OS BiH). U misiji u Iraku učestvovao je dva puta. Prvi put 01.06.2005. godine, kao pripadnik prve i drugi put 21.09.2007. godine kao pripadnik šeste rotacije. Govoreći o motivima odlaska, Lukačević kaže: "U obje rotacije sam bio upućen kao pripadnik Jedinice za uništavanje NUS-a. Kao pripadniku profesionalne vojne jedinice, pored iskustva koje se stiče sa svakim ovakvim angažovanjem, finansijski aspekt nije zanemariv, pogotovo imajući u vidu tadašnja primanja vojnika. Za obje rotacije sam se dobrovoljno javio, iako je, gledajući unazad, postojala razlika u cjelokupnoj atmosferi pred odlazak. Prva rotacija je nosila više neizvjesnosti, budući da niko do tada nije boravio u takvom okruženju i nije bilo informacija "iz prve ruke". Već drugoj rotaciji je bilo lakše, budući da smo imali "pripremljen teren".

Govoreći o iskustvima iz misije Lukačević ističe: "Prvo što se povezuje sa odlaskom u misiju jest sigurnosni rizik. Daleko od toga da on ne postoji, ali je činjenica da samo oni koji borave na ugroženom području stvarno ga mogu i procijeniti. Sasvim je drugačija slika koju ovdje stvaraju mediji od one koju steknete na terenu. Pored ovoga život i rad u terenskim uslovima nauči vojnika primjenjivati sve ono što je učio kroz obuku. Voda, oružje, veza, hrana i higijena u pustinjskim uslovima su ono o čemu se vodi najviše brige, a sve su to stvari na koje ovakva klima sasvim drugačije utiče nego u našim predjelima. Posao na uništavanju NUS-a sam po sebi nosi određeni rizik. Kvalitetna specijalistička obuka koju su u počet-

ku provodili američki instruktori rezultirala je time da je svaka misija uništavanja u potpunosti uspješno izvršena. Bili smo angažovani na raznim područjima: unutar kampa, u naseljenim područjima i u potpuno nenaseljenim pustinjskim predjelima.

Cilj ovakvog angažovanja bio je da omogući nesmetanu upotrebu prostora unutar kampova Koalijskih snaga koji su bili zagađeni NUS-om, omogućiti sigurno kretanje lokalnog stanovništva i korištenje površina za život, kao i onemogućavanje pobunjeničkih grupa da razasuti NUS koriste za izradu improvizovanih eksplozivnih sredstava (IED). Ukupne količine uništenih sredstava dokaz su uspješnosti ove misije. Najveće zadovoljstvo nakon ovako obavljenog posla jesu pohvale nadređenih u lancu komandovanja Koalijskih snaga, a



posebno susretljivost, zahvalnost i gostoljubivost lokalnog stanovništva. Neposredna saradnja sa pripadnicima Koalijskih snaga drugih država je neprocjenjivo iskustvo. Kako je svaka naša misija uništavanja poticala od komande kojem smo bili dodati, tako se ona i na terenu odvijala uz blisku podršku drugih pripadnika Koalijskih snaga. Sa pripadnicima Marinskog kora prošli smo veliki dio provincije Anbar, od Faludže i Ramadia, do Ar Rutbe i Karbale, te sa pripadnicima Poljskog kontingenta čitav MND-CS. Ovo je dokaz da naše jedinice bez oklijevanja mogu da funkcionišu zajedno sa drugim jedinicama iz zemalja koje su članice NATO-a."

Prema riječima Lukačevića prva rotacija Jedinice za uništavanje NUS-a u Iraku bila je ujedno i prva formirana jedinica od bivše VRS i VF BiH: "Zajednička obuka prije upućivanja po BiH od Glamoča, Manjače i Pazarića, stvorila je tim koji se odmah na početku dokazao profesionalnim odnosom prema poslu. Svaka rotacija je dobila najbolje ocjene, pohvale, odlikovanja i medalje od komandanta Koalijskih snaga i komandanta Multinacionalnih divizija.

Nažalost, dio tog stečenog iskustva je nepovratno otišao sa vojnicima kojima ove godine nije produžen ugovor u OS."

Na pitanje da li bi opet išao i zbog čega ili u neku drugu zemlju, ili misiju, te šta bi savjetovao drugima koji su zainteresovani za odlazak u misiju, Lukačević kaže: "Koliko zasada znam, očekuje se upućivanje prve četvorice podoficira u misiju ISAF, zajedno sa oficirima koji su već angažovani u štabu Multinacionalne divizije Sjever. Prijavio sam se. Vjerujem da ću doći na red u jednoj od narednih rotacija. Iskustvo u misijama izvan BiH je vrijedno. Ovo je rijetka prilika koja se pruža vojnicima i podoficirima da steknu iskustvo u sasvim drugačijem operativnom okruženju, a koje će s ponosom isticati. Višemjesečna obuka prije upućivanja i samo angažovanje u misiji čine jedan blok u karijeri koji svaki pripadnik OS BiH treba proći. Dobrovoljnost je još uvijek princip na osnovu kojeg se pripadnici OS upućuju u misiju i vjerujem da drugih principa neće niti trebati."

Na kraju razgovora naš sagovornik poručuje: "Podrška i razumijevanje članova porodice je vrlo važna. Odvojenost od porodice, pogotovo ukoliko se nalazite na području borbenih operacija može utjecati na usredsređenost pri izvršavanju zadataka.

Stoga je bitno vlastitoj porodici osigurati sve što im je potrebno za vrijeme odsutnosti kao i neprestano biti u kontaktu sa njima."

Iskustva iz misije u Iraku



Multinacionalno okruženje - prilika za promociju i unapređenje

Poručnik Edin Osmić na dužnosti je oficira za operacije deminiranja (Operativna komanda OS BiH) i bio je dva puta u misiji podrške miru „Iračka sloboda“. Kako kaže misija Jedinice za uništavanje NUS-a u Iraku je bila pružiti podršku Koalicijskim snagama u identifikaciji i uništavanju neeksplozivnih konvencionalnih ubojnih sredstava (NUS-a) unutar teritorije Iraka. A tokom boravka osme rotacije, u skladu sa zahtjevom Koalicijskih snaga i dobijanja potrebnih saglasnosti iz BiH, misija Jedinice OS BiH za uništavanje NUS-a je proširena i na zadatke vezane za procjenu borbene gotovosti Inženjerske čete IA (Iračka Armija). Prvi put odnosno u trećoj rotaciji OS BiH obavljao je dužnost operatera NUS-a. Jedinica je bila smještena u američkoj Vojnoj bazi Adder Ali provincija Tallil. Naši pripadnici obavljali su čišćenje sajtova (površine zagađene NUS-om) u navedenoj provinciji i na granici sa Kuvajtom, koji su zaostali još od operacije „Putinjska oluja“.

Govoreći o motivima za odlazak u misiju, kaže da su u prvi plan isplivali motivi koji su ga vodili u njegovom radu: „Kao profesionalni vojnik uvijek sam želio da se okušam u jednoj mirovnoj misiji, prije svega da se uvjerim kako je biti u jednoj misiji u nekoj drugoj zemlji. Kako je to pružati pomoć drugima i šta ja trebam doprinijeti da bi to bilo s ljudske strane pozitivno, a vojnički potpomognuto? Naravno, odlaskom u jednu od misija u tom momentu rješavao sam pitanje koje većinu nas tišti, a to je materijalna satisfakcija za jedan lijep porodični život po povratku iz misije.“

Drugi put, kada sam bio u osmoj rotaciji, obavljao sam dužnost zamjenika komandira Jedinice. Jedinica je prvobitno bila smještena u Kampu ECHO provincija AL Diwanijah, a obavljali smo čišćenje sajtova u ovoj provinciji.



Tadašnja vodilja bila je čisto profesionalnog karaktera, jer sam bio u poziciji da vidim kako se planiraju i izvode operacije podrške miru u jednoj mirovnoj misiji. Lijep je osjećaj kada radite sa pripadnicima iz desetak savezničkih armija, razmjenjujete iskustva i unapređujete rad kako bi postavljena misija uspjela. U ovoj misiji sam takođe svoj zadatak obavljao vrlo profesionalno i korektno, što govore visoke ocjene, pohvala ministra odbrane BiH, te medalja za vojne zasluge Vojske SAD“.

Kada govori o ličnim impresijama o boravku u Iraku i izvršenju misije, između ostalog, naš sagovornik, ističe: „Na prvom mjestu je činjenica da nijedan pripadnik OS BiH tokom boravka u Iraku nije stradao (čak nije niti jedno ranjavanje), posebno iz razloga što smo tamo imali dvije jedinice, a jedan od razloga (cijenimo da nije jedini) jeste krajnje odgovoran pristup pripremama i samom provođenju zadataka. Tokom izvršenja misije u Iraku doživljeni smo kao dio rješenja, a ne kao dio problema u toj državi.“

Takođe, jedna smo od rijetkih država u svijetu koja je u momentu slanja (a to je i danas tako) imala mirovne snage u svojoj državi (EUFOR), a istovremeno smo slali naše vojnike van BiH.

Dokazali smo našu spremnost u izvršenju preuzetih obaveza vezanih za uključivanje BiH u evroatlantske integracije.

Rad u multinacionalnom okruženju u kojem su boravile naše snage bila je sjajna prilika za ličnu i kolektivnu promociju i unapređenje sposobnosti kako svakog pripadnika OS BiH, tako i Jedinice u cjelini.

Svakako, treba istaći, da najveća zasluga za uspjeh misije pripada našim vojnicima koji su iskazali spremnost i hrabrost za odlaskom u Irak, s obzirom na činjenicu da je od samog početka pa sve do kraja odlazak u Irak bio isključivo na dobrovoljnoj osnovi“.

Poručnik Osmić posebnim ističe prijateljstvo među pripadnicima OS BiH:

“Prijateljstvo koje se razvilo između pripadnika Jedinice, koje traje i danas, dokazuje da suživot u BiH između naroda postoji i živi, samo treba da se okrenete i da vidite da je to ono što treba ovoj državi.“

Tu smo svi jednaki i oslonjeni samo jedni na druge, jer kad ste u konvoju, prije svega molite dragog Boga da vas ništa ne pogodi, a onda gledate jedni u druge i razmišljate kako ćete sebe i onog pored sebe zaštititi“.

Kako kaže Osmić na kraju razgovora, opet bi išao u misiju: „Kada jednom odete u misiju, išli bi bar još jedanput.“

Bitno je odlučiti se za prvu. Vodilja jednim dijelom jest materijalna, ali ima i adrenalina, i jednostavno želje da se iskušava još, da se nadogradite kao starješina.

Želja mi je još da odem i u misije pod okriljem UN-a, da vidim kako i to izgleda, a prije svega da saznam kako pomoći narodu jedne zemlje gdje se vijori zastava UN-a“.

Pripadnici OS BiH u misiji podrške miru “Iračka sloboda”



Učešće pripadnika OS BiH u misiji u Iraku, kao i svako drugo učešće van teritorije vlastite države je političko pitanje, jer je to stvar državne politike. S druge strane, to je i tehničko pitanje u smislu brojnih obaveza koje je država BiH preuzela, a koje se odnose na približavanje BiH evroatlantskim i drugim integracijama, kao što su EU i NATO. Razvoj i unapređenje odbrambenih sposobnosti Oružanih snaga BiH moguće je najbolje i najracionalnije postići upravo članstvom u evroatlantskim integracijama, tj. Evropskoj uniji i NATO-u. Zvanična politika BiH i njeno Ministarstvo odbrane prepoznali su potrebu razvijanja sposobnosti kroz djelovanje OS BiH sa partnerima, te razvoj i uspostavu standarda koji osiguravaju učešće i, između ostalih, jedinica OS BiH u misiji podrške miru u Iraku.

Slanje naših vojnika u misije van BiH je ispunjenje zakonom utvrđenih obaveza BiH jer je jedna od zadaća OS BiH učešće u operacijama podrške miru (Zakon o odbrani BiH i Zakon o službi u OS BiH).

U skladu sa odlukama Predsjedništva BiH i uz saglasnost državnog Parlamenta prva rotacija prvog kontigenta Jedinice OS BiH za uništavanje NUS-a (36 pripadnika) upućena je iz BiH preko Kuvajta za Irak 01. juna 2005. god. Smjene rotacija vršene su svakih šest mjeseci. Jedinica OS BiH za osiguranje dijela baze “Viktorija” (49 pripadnika) upućena je u misiju 18. 08. 2008. godine. Dolaskom i druge, posljednje grupe pripadnika OS BiH iz Iraka u BiH 15. decembra 2008. godine zvanično je okončana misija naše države u operaciji “Iračka sloboda” u Iraku kroz angažovanje naša dva kontigenta u toj državi i to: Jedinice OS BiH za uništavanje NUS-a i Jedinice OS BiH za obezbjeđenje dijela baze “Viktorija” u Bagdadu.

Obuka pripadnika OS BiH za misiju u Iraku obuhvatala je nekoliko vidova i to: osnovnu obuku, specijalističku i obuku po

specijalnostima, te dopunsku obuku. Prije raspoređivanja u ratno okruženje Iraka našim pripadnicima je bilo osigurano 10 do 12 dana boravka u Kuvajtu radi aklimatizacije, kao i obuka koja je bila prilagođena našim zahtjevima, prvenstveno, prilagođavanje na opremu (m/v) koja su ih čekala u Iraku.

Uspjeli smo da obučimo i certificiramo vlastiti instruktorski kadar koji je u potpunosti preuzeo sve odgovornosti oko obuke od instruktora iz SAD-a počev od 7. rotacije Jedinice OS BiH za uništavanje NUS-a.

Misija Jedinice OS BiH za uništavanje NUS-a bila je da pruži podršku Koalicijskim snagama u identifikaciji i uništavanju neeksploziranih konvencionalnih ubojnih sredstava (NUS-a) unutar teritorije Iraka. Misija Jedinice OS BiH za obezbjeđenje dijela baze “Viktorija” u Bagdadu bila je za štita dijela koalicionih snaga, civilnog osoblja unutar baze, kao i zaštita infrastrukture, objekata i opreme unutar vojne instalacije - baze”.

Rezultati provođenja misije

Po dolasku naših vojnika u Irak gdje su u početku bili smješteni u kampu Al Taqadum za vrlo kratko vrijeme uspjeli su da pokažu visoke standarde vojnog profesionalizma, kao i visok stepen stručnih kompetencija. Iz rotacije u rotaciju, svih osam

rotacija Jedinica OS BiH za uništavanje NUS-a tokom boravka u 3 kampa u Iraku postizala je zapažene rezultate, kako u čišćenju NUS-a van kampova, tako i na drugim područjima života i rada Jedinice, posebno u području sporta gdje su bili u prilici osvojiti puno medalja i drugih priznanja.

Boravak naših vojnika u Iraku tokom tri i po godine učinio je prostor na kom su čistili NUS sigurnim, te na taj način su dali konkretan doprinos stvaranju sigurnog okruženja posebno za lokalno stanovništvo. Iako uspjeh misije ne treba vezati za broj uništenog NUS-a, podatke koji su ažurirani govore da je ukupno pronađeno i uništeno blizu 350.000 komada različitog NUS-a.

U tri i po godine kroz Jedinicu OS BiH za uništavanje NUS-a u 8 rotacija prošlo je 288 pripadnika OS BiH, od čega njih 214 je bilo jedanput u misiji, a 74 dva puta. Pored vojnika koji su bili raspoređeni u dvije naše jedinice, svih ovih godina BiH imala je i oficira za vezu Komandi MNS u Bagdadu njih pet, koji su se međusobno smjenjivali.

Među vojnicima koji su boravili u Iraku bilo je i pet žena u pet rotacija Jedinice OS BiH za uništavanje NUS-a i tri žene u Jedinici OS BiH za osiguranje.

Ono što je najveći uspjeh jeste činjenica da nijedan pripadnik OS BiH tokom boravka u Iraku nije stradao niti je bio ranjen. Treba takođe i istaći da je od početka do kraja odlazak u Irak bio isključivo na dobrovoljnoj osnovi. Ovom misijom smo i praktično dokazali našu spremnost u izvršenju preuzetih obaveza vezanih za uključjenje BiH u evroatlantske integracije, konkretno, kroz učešće naših vojnika u vojnim operacijama van zemlje. Bosna i Hercegovina može biti ponosna na svoje vojnike koji su bili u misiji u Iraku jer su oni na najbolji način, kao istinski ambasadori predstavljali svoju državu van njenih granica, čime je država BiH postala ozbiljan partner i pokazala potencijal u približavanju integracionim procesima, posebno onim koji se odnose na buduće članstvo u NATO-u.



Tranzicija vojnog personala MO i OS BiH



Podmlađivanje i otpust vojnog personala

U skladu sa zakonskim rješenjima i reformskim opredjeljenjima, Ministarstvo odbrane i Oružane snage BiH provode aktivnosti na izboru i prijemu mladih vojnika u Oružane snage BiH, otpustu vojnog personala, te aktivnosti na implementaciji programa „Perspektiva“, namijenjen vojnicima kojima ističu ugovori o profesionalnoj vojnoj službi.



U toku je izbor kandidata za prijem u profesionalnu vojnu službu u Oružane snage BiH za 2011. godinu, putem četvrtog po redu javnog oglasa. Broj kandidata za prijem u Oružane snage BiH, u odnosu na broj koji se prima, višestruko je veći. Na prethodna tri raspisana javna oglasa zaprimljeno je ukupno 11.869 aplikacija, a na posljednji oglas se prijavilo oko 6.000 kandidata na 600 raspisanih pozicija u Oružanim snagama BiH.

Procesu prijema je posvećena posebna pažnja, od propisa koji regulišu prijem vojnika u OS BiH, preko planiranja do realizacije prijema vojnika u OS BiH. Njihov odabir predstavlja vrlo složenu i zahtjevnu aktivnost, a uspostavljeni su jednoobrazni

standardi prijema vojnika, što omogućava da se zaista odaberu najspremniji i najkvalitetniji kandidati za prijem u OS BiH. Kroz prethodna tri javna oglasa u OS BiH je primljeno 1701 mladih vojnika (od kojih je 117 žena), s tim da se od 27. 09. 2010. na osnovnoj vojnoj obuci nalazi 298 kandidata koji će 01. 01. 2011. godine također potpisati profesionalne vojne ugovore, tako da će broj mladih vojnika primljenih na osnovu tri javna oglasa iznositi ukupno 1999.

Dinamika prijema mladih vojnika u profesionalnu službu usaglašena je sa dinamikom procesa prekida vojne službe za vojnike kojima zbog nužnosti primjene zakonskih rješenja u oblasti odbrane ugovori o službi u OS BiH ne mogu biti produženi. Tako je Ministarstvo odbrane BiH sa 28. 02. 2010. godine prekinulo vojnu službu za 299 vojnika, sa 18. 06. 2010. godine za 598 vojnika, sa 31. 08. 2010. godine za 429 vojnika, a sa 31. 12. 2010. godine vojna služba će biti prekinuta za još 464 vojnika, što znači da će u 2010. godini vojna služba biti prekinuta za ukupno 1790 lica. Također, u 2011. godini planiran je otpust za 191 vojnika, dok za 2012. godinu otpust vojnika nije planiran.

Treba napomenuti da je u Ministarstvu odbrane u toku podnošenje zahtjeva za penzionisanje oficira u skladu sa zakonom i očekuje se da do kraja novembra 2010. godine bude podnešeno oko 250 ovih zahtjeva. Na osnovu zakonskih rješenja u toku 2010. godine penzionisano je 46 oficira OS BiH.

Za vojnike koji će u periodu 2010 - 2012. godina zbog zakonskih rješenja napustiti vojnu službu Ministarstvo odbrane BiH implementira program tranzicije i zbrinjavanja otpuštenog personala MO i OS BiH „Perspektiva“. Cilj projekta je pomoć otpuštenom personalu za što lakšu reintegraciju u civilni život. Program predstavlja cjelovit, stručan i efikasan sistem mjera i

aktivnosti kojima se otpuštenom personalu osigurava jedinstvena institucionalna podrška i omogućava savjetodavna, edukacijska i druga stručna pomoć i podrška.

Programom nisu predviđene novčane otpremnine, izuzev zakonskog prava na novčanu naknadu po osnovu nezaposlenosti od strane nadležnih zavoda za zapošljavanje.

Također, za otpuštene vojnike uspostavljen je program podrške „NATO – Perspektiva program“ (ranije NATO TF II) čije je vrijeme realizacije od 01.10. 2010 - 30. 09. 2012. Nacije – Lideri u ovom procesu su Norveška, Holandija i Slovenija, a izvršni agent je Međunarodna organizacija za migracije (International Organisation for Migration - IOM), koja će u ovom procesu, uz Ministarstvo odbrane BiH, pružiti tehničku pomoć za lakšu socijalnu i ekonomsku reintegraciju za vojna lica koja će biti otpuštena u periodu 2010 – 2012. godina.

Donatori „NATO – Perspektiva program“ su Luksemburg, Norveška, Holandija, UK, Švedska, Slovenija, SAD i Bosna i Hercegovina. Planirana sredstva za ovu namjenu iznose oko 4.840.000 eura.



Sastanak načelnika štabova Američko-Jadranske povelje



U Sarajevu je 20. 05. 2010. godine održan sastanak načelnika štabova Oružanih snaga zemalja članica Američko-Jadranske povelje na kojem je, pod radnim nazivom „Korisnost mehanizama NATO programa Partnerstvo za mir u razvoju operativnih sposobnosti sa osvrtnom na rješavanje viškova municije“, razmatrana mogućnost dalje regionalne saradnje u kontekstu rješavanja viškova municije. Sastanku su pored načelnika ZŠ OS BiH general-pukovnika Miladina Milojevića prisustvovali načelnici generalštabova Albanije, Crne Gore, Hrvatske, Srbije, Makedonije i Slovenije. Sastanku su prisustvovali i zamjenik komandanta Američke komande za Evropu general-pukovnik John Gardner, komandant Južnog krila NATO-a admiral Mark P. Fitzgerald, komandant NATO štaba u Sarajevu brigadni general John W. Bulard Jr, komandant EUFOR-a u BiH general-major Bernhard Bair, te vojni predstavnik SAD u NATO-u vice-admiral Richard Gallagher i direktor Uprave za operacije Južnog krila NATO-a general-major Bill Wade.

Ministar odbrane BiH dr. Selmo Cikotić ukazao je na značaj jačanja saradnje u regionu i šire, i naglasio da je „zajedničko planiranje i koordiniranje različitih inicijativa i operacija korisno za sve zemlje-česnice tih procesa“. General Milojević je istakao dobru regionalnu i bilateralnu vojnu saradnju sa zemljama u regionu, članicama PfP-a i NATO savezom, i podsjetio na značajne rezultate ostvarene u okviru regiona, a što se ogleda u prijemu u punopravno članstvo NATO-a i MAP određenog broja zemalja-članica Povelje. General Gardner je istakao značaj susreta na kome je postignuta visoka saglasnost u oblasti vojne saradnje regiona i ukupne sigurnosti. Na kraju Konferencije potpisana je Zajednička izjava, u kojoj su naglašeni prioritetni pravci daljeg djelovanja.

Sastanak sa delegacijom NATO Parlamentarne skupštine



Predstavnici Ministarstva odbrane BiH i Zajedničkog štaba Oružanih snaga BiH održali su 23. 06. 2010. godine u Sarajevu sastanak sa

delegacijom NATO Parlamentarne skupštine, koju je predvodio predsjedavajući Komiteta za odbranu i sigurnost NATO Parlamentarne skupštine Sverre Myrli. U sastavu delegacije NATO Parlamentarne skupštine bili su članovi Komiteta za odbranu i sigurnost, kao i članovi Stalnog komiteta NATO Parlamentarne skupštine. Sastanku su, ispred MO i ZŠ OS BiH, prisustvovali zamjenici ministra odbrane BiH Marina Pendeš i Živko Marjanac, te načelnik ZŠ OS BiH general-pukovnik Miladin Milojević i njegov zamjenik general-major Slavko Puljić. Predstavници MO i OS BiH, između ostalog, upoznali su goste sa trenutnim aktivnostima na ispunjenju uslova za MAP, kao i aktuelnostima u vezi prijenosa vlasništva nad vojnom imovinom, tranzicije vojnog personala i izrade značajnog dokumenta „Pregled odbrane“, te vojnom učešću BiH u misiji ISAF. Gosti su izrazili podršku svim nastojanjima odbrambenih institucija BiH na putu ka članstvu u NATO.

Posjeta delegacije Ministarstva odbrane Mađarske MO BiH



Delegacija Ministarstva odbrane Republike Mađarske, koju je predvodio ministar dr. Cshaba Hende, posjetila je 08.07.2010. godine Ministarstvo odbrane BiH. Delegaciju MO Mađarske primio je ministar odbrane BiH dr. Selmo Cikotić sa saradnicima. Teme razgovora dviju delegacija bile su bilateralna i regionalna saradnja, sa osvrtnom na sigurnosnu situaciju na zapadnom Balkanu.

Ministar Cikotić zahvalio se za podršku koju Mađarska daje radu PSOTC-a u Butmiru, značajnom učešću u sastavu snaga EUFOR-a u BiH, kao i na doniranim sredstvima u NATO Trust fond za zbrinjavanje otpuštenog personala iz OS BiH. „Želimo kreirati konkretne aktivnosti međusobne saradnje odbrambenih struktura, ali i učestvovati u regionalnim projektima i inicijativama“, istakao je nakon razgovora ministar Cikotić.

Ministar dr. Cshaba Hende izrazio je zadovoljstvo posjetom BiH i najavio širenje saradnje dvaju ministarstava u narednom periodu. Značaju razvoja regionalne saradnje u cilju izgradnje većeg nivoa sigurnosti, što je interes obje zemlje, posvećena je posebna pažnja. „Ministarstvo odbrane i Vlada Mađarske će i dalje insistirati na podršci BiH na ispunjavanju uslova za priključenje NATO-u i EU“, rekao je, između ostalog, ministar Hende.

Sastanak ministara odbrane ne-NATO zemalja učesnica u misiji ISAF

Delegacija Ministarstva odbrane Bosne i Hercegovine, koju je predvodio ministar odbrane BiH dr. Selmo Cikotić, prisustvovala je



11. 06. 2010. godine u NATO štabu u Briselu sastanku na nivou ministara odbrane ne-NATO zemalja učesnica u misiji ISAF u Afganistanu. Na sastanku je učestvovalo 46 zemalja, učesnica u misiji ISAF u Afganistanu na nivou ministara odbrane, uz osoblje NATO-a, ISAF-a i drugih institucija i organizacija prisutnih u Afganistanu. Sastanak se fokusirao na dva ključna pitanja – tranziciju i misiju obuke. Tranzicija se definiše kao nastavak, a ne završetak misije ISAF, s jasno definisanim prioritetima (usaglašen road map). Ona podrazumijeva prenos ovlaštenja nadležnosti sa međunarodnih na predstavnike Afganistana na svim nivoima vlasti (centralne i provincijske) do vojske i policije. Misija obuke je prepoznata kao nezamjenjiv instrument tranzicije. Da bi afganistanske strukture mogle preuzeti nadležnost neophodno je da budu adekvatno obučene, te je stoga izražena potreba za povećanjem broja instruktora, čime bi se ubrzao proces tranzicije.

Posjeta delegacije Bosne i Hercegovine Briselu



Ministar odbrane BiH Selmo Cikotić, učestvovao je 14. 07. 2010. godine u sjedištu NATO-a u Briselu, na sastanku delegacije BiH sa generalnim sekretarom NATO-a Andersom Foghom Rasmussenom. Povod sastanku je bilo za-

ključenje prvog ciklusa Individualnog partnerskog akcijskog plana (IPAP) kojeg je BiH u saradnji sa NATO-om uspješno provela u periodu 2008 - 2010. godine. U delegaciji su bili i ministar vanjskih poslova BiH Sven Alkalaj i ambasador BiH pri NATO-u Nikola Radovanović.

Generalni sekretar NATO-a Rasmussen pohvalio je rezultate koje je BiH postigla u IPAP programu i izrazio zadovoljstvo što je velika većina planiranih aktivnosti u IPAP-u provedena. Zahvalio je našoj zemlji za sudjelovanje u NATO-vođenoj operaciji u Afganistanu (ISAF), kao i daljnjim namjerama BiH za povećanjem prisustva u ovoj iznimno važnoj operaciji. Pozvao je BiH da učini dodatani napor kako bi se što prije uknjižila perspektivna vojna nepokretna imovina na BiH, čime bi se ispunio uslov koji su ministri vanjskih poslova zemalja članica NATO u aprilu ove godine u Talinu postavili pred BiH za nesmetano otpočinjanje saradnje u Akcijskom planu za članstvo (MAP). Izrazio je ličnu i spremnost NATO-a da pruži svu potrebnu pomoć BiH u daljnjim reformskim procesima. Delegacija BiH učestvovala je i na sastanku Sjevernoatlantskog vijeća NATO-a (NAC plus BiH), na temu implementacije IPAP-a. U diskusiji o ovoj temi, veliki broj stalnih predstavnika - ambasadora pohvalio je napredak BiH postignut u proteklom razdoblju.

“NATO STANAG Testing Conference”

Ministar odbrane BiH dr. Selmo Cikotić i načelnik Zajedničkog štaba OS BiH general-pukovnik Miladin Milojević otvorili su „NATO STANAG konferenciju“ koja je održana u Domu OS BiH u Sarajevu od 31. 08. do 02. 09. 2010.



godine. Oružane snage BiH, odnosno Odjeljenje za ocjenjivanje poznavanja stranih jezika (STANAG tim) je domaćin konferencije, a organizator konferencije je BILC (Biro za međunarodnu saradnju po pitanju jezika) u saradnji sa Maršal centrom.

Učesnici konferencije su bili iz 16 NATO i partnerskih zemalja (Italija, SAD, Danska, Moldavija, Srbija, Gruzija, Makedonija, Jermenija, Ukrajina, Estonija, Kanada, Azerbejdžan, Albanija, Hrvatska, Švedska i Njemačka). Tema konferencije je bila - Standardizacija pristupa testiranju vještine „Govor“. Ponuda od strane BILC-a i Maršal centra da se konferencija ovog tipa održi u BiH je od ogromnog značaja za BiH STANAG tim, OS i MO BiH u cjelini. Ovim je odati priznanje nivou profesionalnosti, stručnosti i brzini djelovanja kojom je BiH STANAG tim uspješno završio obuku i uspostavio efikasan sistem ocjenjivanja poznavanja engleskog jezika po NATO STANAG 6001 standardu u OS i MO BiH čime je ispunjen prvi partnerski cilj (G-0355-I) za ulazak BiH u NATO, a koji se odnosi na jezičke zahtjeve.

Posjeta delegacije Ministarstva odbrane Austrije MO BiH

Delegacija Ministarstva odbrane Republike Austrije, koju je predvodio ministar mr. Norbert Darabos, posjetila je 21. 07. 2010. godine Ministarstvo odbrane BiH. Delegaciju MO Austrije primila je zamjenica ministra odbrane BiH Marina Pendeš.



U delegaciji MO i OS bili su i zamjenik ministra odbrane BiH Živko Marjanac, načelnik ZŠ OS BiH general-pukovnik Miladin Milojević i njegov zamjenik general-major Slavko Puljić, te ostali predstavnici MO i OS BiH. Susretu su prisustvovali i Nj.E dr. Donatus Köck ambasador Republike Austrije u BiH i komandant EUFOR-a u BiH general-major Bernhard Bair.

Teme razgovora dviju delegacija bile su bilateralna i regionalna saradnja, sa osvrtom na sigurnosnu situaciju na Zapadnom Balkanu, te budućnost i planovi misije ALTHEA.

Zamjenica Pendeš upoznala je delegaciju Austrije sa organizacijom i strukturom MO i OS BiH, te zahvalila za podršku i pomoć koju MO i Vlada Austrije pružaju u realizovanju aktivnosti iz Memoranduma o razumijevanju i Programa bilateralne saradnje. Posebno je naglasila značaj pomoći koju pružaju na polju obuke pripadnika OS BiH.

Ministar odbrane mr. Norbert Darabos najavio je širenje saradnje dvaju ministarstava u narednom periodu. On je rekao da će Austrija, iako nije članica NATO, pružiti podršku naporima za priključenje BiH NATO-u kroz aktivnosti u drugim institucijama međunarodne zajednice, a posebno kao članica Evropske unije.

Pripadnici OS BiH na vježbi “Združeni napor 2010” u Njemačkoj



I ove godine, pripadnici Oružanih snaga BiH učestvovali su na vježbi “Združeni napor” koja je najveća svjetska telekomunikacijska vježba NATO i PpP zemalja. Cilj ove vježbe, u

kojoj je učestvovalo 38 zemalja sa preko 1000 učesnika je provjera interoperabilnosti komunikacijskih sredstava i sistema NATO i PpP zemalja. Iskustva po pitanju interoperabilnosti između zemalja se koriste u planiranju i izvođenju mirovnih misija i operacija. Vježba “Združeni napor 2010” realizovana je u američkoj bazi “Grafenvoehr” u Njemačkoj kao glavnoj operativnoj bazi izvođenja vježbe i američkoj bazi MK u Rumuniji kao pomoćnoj operativnoj bazi izvođenja vježbe, od 02. 09. do 16. 09. 2010. godine.

Delegacija OS BiH na vježbi brojala je 12 pripadnika, koji su učestvovali u 6 oblasti, a to je oblast radio sa uređajima HF HARRIS RF 5.800 i VHF ASELSAN 9.612, oblast telefonskih centrala sa telefonskom centralom ERICSSON MD-110, zatim oblast informatike, kao i oblast mrežnih usluga sa serverom HP PROLIANT ML 570 G4 i ruterom CISCO 7206 VKSR Series, te oblast menadžmenta sa frekventnim spektrom i oblast zaštite od informatičkih napada. Pored ovih uređaja u jednoj od operativnih mreža vježbe učestvovao je i uređaj HF HARRIS RF 5800-400 V lociran u kampu Butmir.

Civilno-vojna vježba “Združeni odgovor Sarajevo 2010”



U kasarni Rajlovac 15.09.2010. godine izvedena je civilno-vojna vježba odgovora na teroristički napad i otklanjanje njegovih posljedica pod nazivom “Združeni odgovor 2010”. Vježba je provedena u organizaciji Ministarstva sigurnosti BiH u saradnji sa Ministarstvom odbrane BiH, OSCE Misijom za BiH i Komandom NATO-a u BiH. U vježbu su bili uključeni predstavnici svih nivoa vlasti u BiH, kao i predstavnici susjednih zemalja. MO i OS BiH dali su puni doprinos u organizacionom dijelu vježbe, učešćem u Radnoj grupi za pripremu i provođenje vježbe, kao i implementacionom dijelu vježbe kroz logističku i infrastrukturnu podršku. OS BiH su aktivno učestvovali u provođenju vježbe sa timom za NKBR detekciju i timom vazdušnih snaga za potrebe MEDEVAC-a, koji su pokazali visok stepen obučenosti i uvježbanosti, kako u samostalnom izvršenju zadatka, tako u koordinaciji sa predstavnicima civilnih institucija koje su učestvovali na vježbi.

Ministar Cikotić na ministarskom sastanku SEDM-a



Delegacija MO BiH, koju je predvodio ministar odbrane BiH dr. Selmo Cikotić, učestvovala je na ministarskom sastanku SEDM-a (Organizacija ministara odbrane zemalja Jugoistočne Evrope), koji je održan od 11. do 12. oktobra 2010. godine u Tirani, Albanija. Tokom sastanka razgovaralo se o dostignutim rezultatima i planiranim aktivnostima u okviru SEDM-a, a ministar Cikotić je u svom izlaganju informirao skup o napretku BiH u reformama odbrane, te nastojanjima za potpuno euroatlantsko integriranje, u čemu je SEDM istaknut kao važan forum za dostizanje ovog cilja. On je posebno informirao skup o rješavanju viška naoružanja i municije, te učešću MO i OS BiH u aktivnostima SEDM-a. Pozdravio je prijem Crne Gore i Srbije u punopravno članstvo ove organizacije i podržao inicijativu da se do sljedećeg ministarskog sastanka razmotri prijedlog da Bugarska u narednom periodu bude zemlja stalni domaćin Štaba komande brigade SEEBRIG.

Učešće na vježbi “MEDCEUR 2010” u Crnoj Gori



Delegacija MO i OS BiH, koju je predvodio načelnik ZŠ OS BiH general-pukovnik Miladin Milojević, prisustvovala je 17. 09. 2010. godine pokaznoj vježbi spasavanja u vanrednim situacijama, koja je u okviru Međunarodne vojnomedicinske vježbe “MEDCEUR 2010” održana u kasarni “Milovan Šaranović” u Danilovgradu, Crna Gora. Međunarodna vojnomedicinska vježba “MEDCEUR 2010” predstavljala je mjesto za provjeru zajedničkog rada vojnih i civilnih struktura u hitnim slučajevima i provjera njihove međusobne kooperabilnosti i interoperabilnosti. Završnom dijelu vježbe su prisustvovali i predstavnici MO BiH, pomoćnik ministra za logistiku mr. Trpimir Rebac i brigadir Mirso Zuhrić. Vježba je izvedena na pet poligona i to u situacijama požara u zgradi, saobraćajnog udesa i izlivanja hemijskih supstanci, rušenja mosta, zbrinjavanja povrijeđenih u bolnici, a na kraju je predstavljen sistem zaštite i spasavanja u Crnoj Gori. Bosna i Hercegovina će biti domaćin vježbe “MEDCEUR 2012”.

Simulacijska vježba “SEESIM - 2010”

Pripadnici MO i OS BiH učestvovali su na Međunarodnoj simulacijskoj vježbi „SEESIM -2010“, koja je održana u našoj zemlji od 20. do 24. 10. 2010. godine.

U ovoj vježbi učestvovali su zemlje jugoistočne Evrope (članice SEDM-a), a mjesto održavanja je bio Operativni centar MO BiH sa sjedištem u Sarajevu. Cilj vježbe je bio simulirati rad BH kriznog centra, BH civilnih agencija, Ministarstva sigurnosti BiH, MO i OS BiH, te struktura civilne zaštite u ispunjavanju zadatka u odgovoru na vanredne situacije. U vježbi su bile uključene civilne i vojne ustanove ministarstava odbrane zemalja jugoistočne Evrope: Albanije, BiH, Bugarske, Hrvatske, Grčke, Italije, Makedonije, Rumunije, Turske, Ukrajine, Srbije i Crne Gore u ulozi posmatrača, kao i Komanda brigade za jugoistočnu Evropu (SEEBRIGHQ). Nosilac aktivnosti za pripremu BiH u realizaciji vježbe bilo je Ministarstvo sigurnosti BiH uz aktivno učešće i podršku MO i OS BiH. Domaćin vježbe bila je Albanija sa sjedištem u Tirani, a organizator vježbe SAD, uz pomoć WIF fonda.



Sporazum o saradnji između BiH i Crne Gore



Ministar odbrane BiH dr. Selmo Cikotić i ministar odbrane Crne Gore mr. Boro Vučinić potpisali su 14. 10. 2010. godine u Podgorici Sporazum o saradnji u području odbrane između Vijeća ministara BiH i Vlade Crne Gore.

Sporazum, između ostalog, predviđa vojnu saradnju u oblastima podrške u institucijama NATO-a, naoružanja i vojne opreme, obuke, aktivnostima u okviru Ppf i regionalnim organizacijama, razmjeni iskustava oko uništavanja viška naoružanja, logističkoj podršci, operacijama podrške miru, upravljanja krizama i dr.

Na osnovu ovog Sporazuma Vijeće ministara BiH i Vlada Crne Gore će sačiniti godišnji Plan bilateralne saradnje za narednu godinu.

MO i OS BiH Domaćin 51. Svjetskog vojnog prvenstva u skijanju 2011. godine



Nakon prihvatanja kandidature Bosne i Hercegovine od strane Direktorijata Međunarodnog vojnog komiteta za sport (CISM), Ministarstvo odbrane i Oružane snage BiH bit će domaćin i organizator 51. Svjetskog vojnog prvenstva u skijanju, koje će se održati od 21. do 26. februara 2011. godine.

Takmičenja će se izvoditi u četiri discipline:

1. alpska disciplina veleslalom
2. nordijsko trčanje za žene i muškarce na 10 i 15 kilometara
3. biatlon – takmičenje na 7 i 10 kilometara za žene i muškarce
4. ekipno – štafeto trčanje.

Takmičenja će se izvoditi na olimpijskim planinama Igmanu, Bjelašnici i Jahorini. Oružane snage Bosne i Hercegovine spremne su za održavanje 51. Svjetskog vojnog prvenstva u skijanju i doček najboljih vojnika – sportista iz cijelog svijeta.

Nadamo se i vjerujemo da će naša bosanskohercegovačka tradicija, volja i spremnost doprinijeti uspješnoj realizaciji ovog značajnog sportskog događaja.



Konferencija o značaju parlamentarnog vojnog povjerenika BiH



U Sarajevu je 19. 10. 2010. godine održana konferencija pod nazivom "Značaj i uloga parlamentarnog vojnog povjerenika BiH u zaštiti ljudskih prava i sloboda vojnih lica i kadeta".

Organizator ovog skupa bili su parlamentarni vojni povjerenik Boško Šiljegović i Misija OSCE-a u BiH. U uvodnom izlaganju predsjedavajući Zajedničke komisije za odbranu i sigurnost BiH Branko Zrno je istakao: "Uspostavom funkcije parlamentarnog vojnog povjerenika BiH, Parlamentarna skupština BiH je u prvom redu željela razvijati mehanizam i jačati zaštitu ljudskih prava svih pripadnika obrambenog sistema.

Sada već mogu reći da smo u tome uspjeli. Uspostavom parlamentarnog nadzora u skladu sa ustavnim i zakonskim principima Parlamentarna skupština ispunila je jedan je od temeljnih uvjeta za članstvo u NATO programu "Partnerstvo za mir", rekao je Zrno. Parlamentarni vojni povjerenik Boško Šiljegović istakao je da je Ured parlamentarnog vojnog povjerenika u BiH za godinu dana postojanja primio 109 pritužbi pripadnika Oružanih snaga BiH, od kojih su 44 riješene. Govoreći na konferenciji Šiljegović je naveo da je njen cilj analiza dosadašnjeg rada institucije vojnog povjerenika u BiH. "To je autonomna civilna in-

stitucija, koja je odgovorna za zaštitu temeljnih prava pripadnika OS. U svom dosadašnjem radu uočio sam da posebnu pažnju treba posvetiti pitanju statusa žena pripadnica OS, naročito u pogledu pristupa vojnoj službi i specifičnim pozicijama u OS, poslovima i jednakim mogućnostima napredovanja", objasnio je Šiljegović.

Ministar odbrane BiH Selmo Cikotić ocijenio je da institucija parlamentarnog vojnog povjerenika predstavlja formulu koja svojim pozitivnim primjerom može poslužiti u rješavanju mnogih otvorenih pitanja u BiH. Njemački vojni povjerenik Helmug Kenigshaus naveo je da Ured vojnog povjerenika u njegovoj zemlji u jednoj godini od pripadnika vojske primi preko šest hiljada žalbi i dodao da će ovaj Ured i dalje davati podršku demokratskoj parlamentarnoj kontroli OS BiH. Zamjenik šefa Misije OSCE-a u BiH Vadim Kuznjecov, izrazio je zadovoljstvo uspostavljanjem i radom institucije parlamentarnog vojnog povjerenika u BiH, podsjetivši da je da Misija OSCE-a od samog početka bila uključena i sarađivala u raspravama, te konkretnim aktivnostima oko uspostavljanja ove institucije.



Aktivnosti Komande za podršku i potčinjenih jedinica

Uspješno realizovane aktivnosti u centrima za obuku



U svim centrima iz sastava Komande obuke i doktrine, jedinice Komande za podršku OS BiH, tokom 2010. godine realizirane su planirane aktivnosti. Tako su kroz Centar za osnovnu obuku prošle tri generacije kandidata za prijem u profesionalnu vojnu službu. Tokom tromjesečne obuke osposobljavani su za izvođenje osnovnih vojnih vještina i usvajali osnovna vojnička znanja. Nakon uspješno završene obuke primljeni su u profesionalni sastav OS BiH i u operativnim jedinicama nastavili usavršavati znanja i usvajati nova koja su im potrebna za pravovremeno i kvalitetno izvršavanje postavljenih zadataka. Za OS BiH je to veliki korak na podmlađivanju kadra.

U Centru za borbene simulacije, sve jedinice, a ove godine na redu su bili treći bataljoni pješadijskih brigada, su izvele simulacijske vježbe na JANUS i BBS sistemu kao pripremu za izvođenje rotacije u Centru za borbenu obuku na Manjači kod Banjaluke. Osim toga simulacijske vježbe

na BBS sistemu su izvedene i na nivou komandi pješadijskih brigada.

U Centru za borbenu obuku su u avgustu, septembru i oktobru 2010., pripadnici pripremanih bataljona uspješno izveli rotacije, čime je praktično završen trogodišnji ciklus kolektivne obuke za pripadnike pješadijskih brigada. Sve vježbe su izvođene pod nadzorom instruktora iz sastava pomenutih centara.

Pripadnici OS BiH angažirani u Centru za profesionalni razvoj takođe su realizirali veliki broj aktivnosti. Najviše aktivnosti bilo je u Odjeljenju stranih jezika, a, s obzirom na mjesto koje mu pripada, najviše na kursovima engleskog jezika. Tako su tokom godine završena dva ciklusa engleskog jezika koje su u mini/midi centrima OS BiH za učenje engleskog jezika pohađala 343 pripadnika, u glavnim centrima u Sarajevu i Banjaluci ukupno 99 polaznika, te Rajlovcu po tzv. IMET programu 76 pripadnika iz sastava OS BiH. Nivoi koji su pri tom realizirani su od osnovnog do višeg srednjeg nivoa. Osim toga, na kursu engleskog jezika u dva navrata je bilo i 60 pripadnika, kandidata koji se pripremaju za PSOTC, organizirana su dva kursa za instruktore engleskog jezika, te specijalistički kurs engleskog jezika za pripadnike vojne policije.

Na kursu turskog jezika, koji se održava u Rajlovcu, u 2010. za 9 polaznika je nastavljen kurs za srednji nivo, započet 2009. godine, te je održan kurs višeg nivoa za 17 pripadnika OS BiH, kao nastavak prethodnog i ujedno završetak ciklusa učenja turskog jezika. Od 14. oktobra 2010. počeo je novi ciklus osnovnog nivoa za 17 polaznika. Na kursu grčkog jezika koji se organizira u Banjaluci, za 18 pripadnika OS BiH koji su

u januaru 2010. završili prvi stepen grčkog jezika tokom 2009. od početka marta do kraja juna organiziran je drugi stepen na kom je bilo 18 polaznika, a od 13. septembra u toku je treći stepen kursa grčkog jezika koji pohađa 13 polaznika.

Na kursu francuskog jezika, koji se realizira u Rajlovcu, za one koji su od januara do maja 2010. uspješno završili osnovni nivo, od 6. septembra u toku je napredni nivo. Na tom kursu trenutno je 9 polaznika, a tokom maja i juna za 8 polaznika je organizirano kondicioniranje francuskog jezika.

Slično je i sa kursom njemačkog jezika, gdje je 8 polaznika u Rajlovcu završilo osnovni nivo tokom 2010. godine, a na kondicioniranju njemačkog od oktobra 2010. bilo je 10 polaznika. U Banjaluci je tokom 2010. organiziran i tromjesečni kurs italijanskog jezika, drugi nivo, koji je pohađalo 5 pripadnika OS BiH.

Pripadnici CPR-a su, takođe na osnovu Godišnjeg plana obuke od 20. 01. do 16. 07., sa 32 oficira realizirali komandno-štabni kurs, te osnovne i napredne oficirske i podoficirske kurseve. U dva navrata je organiziran osnovni podoficirski kurs koji je pohađalo po 30 podoficira, jednom je organiziran napredni podoficirski kurs koji je pohađalo 30 podoficira, te su realizirani osnovni oficirski i napredni oficirski kurs na kojima je takođe bilo po 30 oficira.

Izvedeno je i niz specijalističkih kurseva, kao što su obuka vojnika sanitetske službe, obuka podoficira za učesće u operacijama podrške miru, obuka pripadnika Manevarskog vježbovnog bataljona, obuka vozača i posada tenkova T-84, obuka instruktora CPR-a, te kurs informatike i drugi.





Na osnovu godišnjeg Plana obuke Komande 5. pbr za 2010. godinu, štab Komande brigade je zajedno sa komandama podređenih jedinica od 24.08. do 27.08. 2010. godine realizovao vježbu pod nazivom „Talas 10“ na sistemu BBS u Centru za borbene simulacije „Žunovnica“. Pored personala brigade na vježbi je učestvovao i dio pripadnika KP OS BiH (5.bLP) i OK OS BiH (brTP i brZS), te instruktori iz CBS. Cilj vježbe bio je sagledavanje sprovođenja procedura komandovanja i kontrole, te koordinacije kako unutar Štaba brigade, tako i prema pretpostavljenoj komandi, susjedima, te podređenim jedinicama brigade tokom izvođenja operacija. Ovim aktivnostima je prethodila MAPEX vježba na kojoj su kroz proces donošenja vojnih odluka sačinjena neophodna operativna dokumenta za izvođenje operacija na sistemu BBS. Iako su tokom vježbe sagledavani svi borbeni operativni sistemi, težište je ipak, pri realizaciji „Talas 10“ bilo usmjereno na funkcionisanju sistema logističkog snabdijevanja.

Realizovana simulacijska vježba u Centru za borbene simulacije



koordinacijske sastanke na V-60 i V-30 sa starješinama CBS u cilju upoznavanja starješina Komande brigade od strane osoblja Centra o mogućnostima sistema, te obavezama koje proističu u pripremnj i fazi realizacije navedene aktivnosti, zatim definisanje listi osnovnih zadataka misije (LOZM) brigade u cilju realizacije simulacijske vježbe, a koji su se odnosili na posjedanje operativnog rejonu, priprema za borbena dejstva u operativnom rejonu, kao i prolazak kroz raspored neprijateljskih snaga, organizovanje i izvođenje protivnapada i planske odbrane.

Nakon prijema operativnog naređenja (OPNAR-a) od strane CBS, Komanda brigade pristupila je realizaciji procesa donošenja vojnih odluka. Navedenim procesom uspješno je izvršeno niz analiza (misije, terena i rizika, vlastitih snaga), donesena odluka u skladu sa dodjeljenom misijom, te izrađeni dokumenti za vježbu. Svakako, za realizaciju vježbe definisan je i cilj, a odnosi se na osposobljavanje pripadnika 6.pbr za realizaciju misije po definisanoj listi osnovnih zadataka. Realizacijom vježbe starješine su iskazale veliku želju za uspješno izvršenje postavljene misije. Po završetku vježbe izvršena je analiza, u skladu sa definisanim standardnim operativnim procedurama Centra, te nakon toga 6.pbr dodjeljen je certifikat za uspješno izvedenu simulacijsku vježbu na sistemu BBS.

Aktivnosti uništavanja naoružanja

Najviši predstavnici MO i ZŠ OS BiH i delegacija Ambasade SAD u BiH, koju je predvodio ambasador NJ. E. Patrick S.Moon, prisustvovali su 27. 09. 2010. godine aktivnosti uništavanja viškova pušaka M 16 A1 u kasarni OS BiH „Teufik Buza Tufu“ u Visokom.



Radi se o procesu uništavanja 30.081 puške M16 A1 koji se odvija pod presom, a cjelokupni proces odvija se pod kontrolom pripadnika Nacionalne garde Merilenda, u koordinaciji sa organizacijom UNDP i OS BiH. Do sada je uništeno oko 8.500 pušaka, a dnevno se uništava oko 1.300 komada. Ministar odbrane BiH dr. Selmo Cikotić je posebno istakao transparentnost postupka uništavanja naoružanja i značaj uništavanja viška naoružanja koje je Predsjedništvo BiH identifikovalo kao višak u BiH, te se zahvalio na pomoći koju u ovom procesu pružaju SAD i organizacija UNDP. Ambasador Moon izrazio je zadovoljstvo dosadašnjim postupkom uništavanja naoružanja i istakao da će SAD i u ovom segmentu nastaviti pružati podršku OS BiH. Uništavanju naoružanja, osim najviših dužnosnika MO i OS BiH i delegacije Ambasade SAD, prisustvovao je komandant NATO štaba u BiH brigadni general David Eneyeart i šef UNDP u BiH Yuri Afanasiev.

Treći pješadijski bataljon 4.pbr. uspješno realizovao planirana gađanja



Treći pješadijski bataljon nakon izvršenog izviđanja, te uspješno provedenog organizovanog kretanja motornim vozilima na relaciji: Ustikolina (Goražde), Tjentište - Čemerno - Gacko - Bileća - Berkovići - Stolac - Čapljina - Posušje - Livno - Glamoč - Mliništa - Manjača, kao poslednja kapija prije rotacione vežbe 3. pješadijskog bataljona, obavljeno je bojevo gađanje minobacačima 120 mm (8 oruđa), 60 mm (2 oruđa) i protivoklopnim vođenim raketnim sistemom POLK 9 K 111 "Fagot" od 23. do 27. avgusta 2010. godine na lokalnom poligonu za obuku Manjača kod Banja Luke.

Cilj KBG je provjera osposobljenosti posada i poslugu jedinica za rotacijsku vežbu 3.pješadijskog bataljona. Aktivnosti gađanja realizovale su minobacačke posluge iz minobacača 60 i 120 mm, protivoklopnim raketnim sistemom i 9 K111 FAGOT na zadate ciljeve. Vrijedno je pomenuti, da su pripadnici minobacačkog voda 120 mm 3. pješadijskog bataljona pridodati iz 2. pješadijskog bataljona sa sjedištem Bileći, a posluge minobacača 60 mm iz 1. pješadijskog bataljona sa sjedištem u Livnu.

Rezultat kvalifikacijskog bojevog gađanja ocjenjen je sa najvišom ocjenom. Ovim aktivnostima 3.pb, kao nosilac predstojeće rotacije, ispunio je sve potrebne preduslove za izvršenje zadatka.

Pomoć lokalnom stanovništvu prilikom poplava u Derventi



Nakon izlivanja rijeke Ukrine u Derventi 22. i 23. 06. 2010. god. pripadnici Inženjerskog bataljona Brigade taktičke podrške su bili angažovani na pružanju pomoći lokalnom stanovništvu. Pomoć se ogledala u doturu hrane i vode do najugroženijih kuća, kao i prebacivanju stanovnika na sigurna mjesta. Generalno je mišljenje lokalnog stanovništva da su pripadnici Inženjerskog bataljona svojim požrtvovanjem i umijećem bili od velike koristi pri pružanju pomoći stanovništvu, pogotovo u trenucima kad je gradom vladala panika i trka za spašavanjem ljudskih života i lične imovine.

Prisebnost koju su pripadnici Inženjerskog bataljona tada pokazali su upravo rezultat visoke organizovanosti i timskog duha koji se njeguju u ovoj jedinici.

Završetak obuke šeste generacije kandidata za prijem u OS BiH



U Centru za osnovnu obuku u Pazariću 27.08.2010. godine održana je svečanost povodom završetka obuke šeste generacije kandidata za prijem u Oružane snage BiH. Aktivnosti su prisustvovali ministar odbrane BiH Selmo Cikotić, načelnik ZŠ OS BiH general-pukovnik Miladin Milojević, zamjenik komandanta Komande za podršku brigadni general Dragan Vuković, te ostali komandanti komandi i jedinica OS BiH. Pored pripadnika MO i OS BiH, na svečanosti su bili predstavnici NATO štaba u Sarajevu, kao i predstavnici vojno-diplomatskog kora u BiH.

Obuku u šestoj klasi kandidata završilo je 296 vojnika među kojima je 25 žena i na dan svečanosti su potpisali ugovor o prijemu u profesionalnu vojnu službu i raspoređeni u operativne jedinice OS BiH u kojima će uz rad nastaviti daljnje usavršavanje.

Ministar Cikotić u svom obraćanju je rekao da BiH ima pozitivna očekivanja i nade za budućnost i nastaviti će svoj put prema zajednici razvijenih i demokratskih naroda kroz stalni progres u provođenju reformi. "Ova generacija je dio ovog procesa sa kojim nastavljamo proces podmlađivanja sastava OS BiH i taj proces će se odvijati i u narednom periodu", istakao je Cikotić. Uspješno završenu osnovnu obuku, polaganje svečane zakletve i potpisivanje ugovora vojnicima je čestitao komandant Centra pukovnik Samir Nukić: "Pred vama su novi izazovi sticanja znanja, usavršavanja i izgradnje snažnih psiho-fizičkih ličnosti. Izgrađujući sebe kao pojedinca u stručnom i svakom drugom pogledu, dajete i svoj puni doprinos u izgradnji i jačanju OS BiH i države BiH". Nakon analize rezultata, za naročito iskazano zalaganje u toku obuke i u vannastavnim aktivnostima, dodijeljene su stimulativne mjere najboljim vojnicima, a to su u ovoj klasi: Ahmetović Uzeir, Begović Emir, Rakovac Šaban, Bećirović Irma, Bajić Brankica, Škrbić Bojan i Matijašević Boris.

Deklarisana četa realizirala kvalifikacijska gađanja

U sklopu svojih redovnih aktivnosti od 29.08. do 03.09.2010. godine pripadnici deklarirane čete 4. pješadijske brigade izvršili su kvalifikacijska bojeva gađanja sa ličnim naoružanjem i pješadijskim naoružanjem koja nisu u formacijskoj upotrebi u 4.pbr. Navedena gađanja realizirana su na strelištu "Vodena gradina" Bileća uz upotrebu automatizovanog strelišta. Kroz gađanja sagledana je osposobljenost pripadnika deklarirane čete u rukovanju formacijskim i neformacijskim naoružanjem. Komandant 1. pješadijskog bataljona pukovnik Mijo Šteko istakao je da navedena gađanja umnogome doprinose povećanju osposobljenosti svakog pripadnika deklarirane čete i da će se slična gađanja planirati i u narednom periodu sa ciljem što bolje osposobljavanja svakog njenog pripadnika. Rezultati postignuti na gađanju umnogome govore o dobroj realizaciji planiranih sadržaja obuke u prethodnom periodu, posebno novoprimljenih vojnika koji su se po prvi put sreli sa po jedinim bojevim sredstvima i ostvarili zapažene rezultate.



Realizovana terenska vojna vježba - Rotacija 3/6.pbr na Manjači



Vježba je realizovana na poligonu „Manjača“ 20. 09. 2010. godine sa ciljem provjere osposobljenosti pripadnika 3/6.pbr OS BiH. Na vježbi je učestvovalo oko 300 vojnika dok je gađanje realizovano iz SVLR APRA 122mm, haubica 122mm, minobacača 120 i 60 mm, POLK 9K 111 "Fagot" te

ostalog pješadijskog naoružanja. Izvođenje ostalih taktičkih radnji i postupaka upotpunjeno je helikopterskim desantom i MEDAVAC operacijama.

Završnoj vježbi prisustvovali su zamjenik ministra odbrane BiH Živko Marjanac, načelnik ZŠ OS BiH general-pukovnik Miladin Milojević, komandant OK OS BiH general-major Anto Jeleč, komandant Komande za podršku general-major Mirsad Gutić, komandanti brigada OS BiH, vojni atašei akreditovani u BiH, predstavnici NATO-a i EUFOR-a u BiH.

Komanda za obuku i doktrinu (KOiD) je sačinila scenarij koji je obuhvatao niz taktičkih radnji Komande bataljona i jedinica kao što su posjedanje područja okupljanja, prijem operativnog naređenja pretpostavljene komande, te realizacija procesa donošenja vojnih odluka, pokret do kontakta (PDK), planirana odbrana, kontranapad, te izvršenje taktičkog marša i zaposjedanja borbene pozicije bataljona za izvođenje bojevog gađanja. U toku izvršenja rotacije 3.pb pridodate su jedinice iz drugih sastava OS BiH: inženjerska jedinica iz sastava brTP, 5.blp KL, artiljerijska baterija ab/6.pbr, ič/6.pbr, vvp/6.pbr kao i pripadnici brViPVO koji su bili angažovani sa sredstvima na vježbama u toku priprema za rotaciju, kao i na izvršenju same rotacije.



Vježba gašenja požara u Bileći

Na zajedničkoj vježbi gašenja požara održanoj 11. 06. 2010. godine u Bileći, koja je bila u organizaciji 4. pješadijske brigade OS BiH, pored pripadnika brigade učestvovali su i jedinice brigade ZS i PZO OS BiH, kao i jedinice vatrogasnih društava opština Bileća i Trebinje. Pripadnici 1. helikopterskog skvadrona iz Banja Luke učestvovali su sa dva helikoptera MI-8T sa zadatkom gašenja požara protivpožarnim vedrom PPV-2000, kao i jednim helikopterom tipa SA-342 „Gazela“ sa zadatkom izviđanja rejonu požarišta i medicinske evakuacije. Na taktičko-tehničkom zboru, održanom neposredno prije vježbe gašenja požara, pripadnicima vojno diplomatskog kora stranih zemalja, kao i predstavnicima Ministarstva odbrane BiH i Operativne komande OS BiH, prikazane su taktičko- tehničke mogućnosti helikoptera MI-8 i SA-342 „Gazela“ pri gašenju požara i medicinskoj evakuaciji.



Namjena i zadaci Bataljona letačke podrške

Pod Komandom brigade ZS i PZO djeluje i Bataljon letačke podrške koji je namijenjen za održavanje visokog stepena operativnosti aviona i obučenosti personala s ciljem zračne podrške helikopterskim jedinicama iz sastava br ZS i PZO, kao i za uspostavljanje i održavanje sistema veza na nivou br ZS i PZO. Glavni zadaci ovog bataljona su: održavanje aviona u II i III stepenu održavanja, izvođenje probnih letova nakon obavljenih radova kao i standardizovanje, planiranje, priprema i izvršenje propisanih individualnih i kolektivnih administrativnih procedura u svim organizacionim cjelinama bLP. U jedinici se vrše 50-satni, 100-satni i 200-satni povremeni pregledi na helikopterima iz porodice MI, fazni pregledi na helikopterima UH-1H (6 faznih pregleda na svakih 150 s. naleta), kao i godišnji i C1 pregledi na helikopterima "Gazelle". Po izvršenju ovih pregleda, u koordinaciji sa letačkim jedinicama, bataljon LP je odgovoran za izvođenje probnih letova.



Padobranski kup
u Prijedoru

Na 15. Petrovdanskom padobranskom kupu održanom u Prijedoru 03. i 04. 07. 2010. godine na sportskom aerodromu Urije, 1. Helikopterski skvadron je učestvovao sa jednim helikopterom MI-8T i dvije posade, kao i pratećim timom logističke podrške. U dvodnevnom takmičenju na kojem su učestvovali predstavnici Slovenije, Mađarske, Hrvatske, Srbije, Crne Gore, Makedonije i Bosne i Hercegovine (ukupno 63 padobranca), ostvareno je 567 padobranskih skokova.



Završena rotacija 3. pješadijskog bataljona 4. pješadijske brigade



Pripadnici 3.pb/4.pbr OS BiH realizovali su rotacijsku vežbu u Centru za borbenu obuku (CBO) na poligonu Manjača - Banja Luka u vremenu od 06. 10. do 13. 10. 2010. godine.

Rotaciona vježba, kao kruna obuke u trogodišnjem ciklusu obučavanja, realizovana je nakon dugih priprema i uvježbavanja Komande i jedinica 3. pješadijskog bataljona koji su prošli veliki broj situacijskih vežbi (STH), simulacijske vježbe na operativnom sistemu JANUS, te kvalifikacionih bojevih ciljanja (KBC). Vježba je realizovana po scenariju koji je sačinila Komanda obuke i doktrine (KOiD), a obuhvatao je niz taktičkih radnji Komande bataljona i jedinica kao što su: posjedanje područja okupljanja, prijem operativne

naredbe od pretpostavljene Komande, realizaciju procesa donošenja vojnih odluka, pokret do kontakta (PDK-a) planska odbrana, kontranapad te izvršenje taktičkog marša i zaposjedanje borbene pozicije za izvođenje bojevog ciljanja. Završnog dana rotacije 12.10.2010. godine, kao kruna uspješno izvedene vježbe i provjere obučenosti pojedinaca, posluga i jedinica - izvedeno je bojevo gađanje iz pješadijskog naoružanja: puška M16-A1, puškomitraljez M 60, minobacača 60 mm, minobacača 120 mm i FAGOT - POLK 9K 111.

U podršci za medicinsku evakuaciju učestvovala je brigada ZS i PZO. Završnom činu rotacione vježbe prisustvovali su predstavnici 4.pbr, OK OS BiH, te predstavnici KOiD-a.

1. decembar



Dan Oružanih snaga Bosne i Hercegovine